

Псалтирь

На церковно-славянском языке

Псалмы, употребляемые на богослужениях

Утренняя: Начало: [19](#), [20](#). Шестопсалмие: [3](#), [37](#), [62](#), [87](#), [102](#), [142](#).
Перед канонам: [50](#). Хвалительные псалмы: [148](#), [149](#), [150](#).

Часы: Первый: [5](#), [89](#), [100](#). Третий: [16](#), [24](#), [50](#).

Шестой: [53](#), [54](#), [90](#). Девятый: [83](#), [84](#), [85](#).

Вечерняя: Предначинательный псалом: [103](#), "Блажен муж:" [1](#). На "Господи воззвах:" [140](#), [141](#), [129](#), [116](#). В конце вечерни: [33](#) (только Великим постом).

Повечерие: [4](#), [6](#), [12](#), [69](#), [90](#), [142](#).

Перед причащением: [22](#), [23](#), [115](#).

Литургия: [102](#), [145](#).

Погребение: [118](#).

Молебны: о болящем: [70](#), благодарственный: [117](#), новый год: [64](#), путешествующим: [120](#), просительный молебен: [142](#).

Псалмы по содержанию

Благодарственные и хвалебные: [33](#), [65](#), [66](#), [91](#), [95](#), [96](#), [102](#), [103](#), [116](#), [144](#), [145](#), [149](#), [150](#).

Прославляющие Бога: [8](#), [17](#), [18](#), [92](#), [97](#), [102](#), [103](#).

Назидательные: [1](#), [40](#), [32](#), [45](#), [84](#), [89](#), [100](#), [110](#), [111](#), [126](#), [140](#).

Изливающие скорбь: [3](#), [12](#), [16](#), [37](#), [54](#), [87](#), [141](#), [142](#).

Выражающие надежду на Бога: [5](#), [14](#), [22](#), [53](#), [85](#), [90](#), [111](#), [120](#), [124](#), [137](#), [139](#).

Просящие о защите и помощи: [3](#), [4](#), [24](#), [40](#), [54](#), [69](#), [83](#), [85](#), [90](#), [142](#).

Покаянные: [38](#), [50](#).

Выражающие радость: [32](#), [83](#), [114](#).

Псалом 1

Блажен муж, иже не иде на совет нечестивых, и на пути грешных не ста, и на седалищи губителей не седе; но в законе Господни воля его, и в законе его поучится день и ночь. И будет яко древо насажденое при исходищих вод, еже плод свой даст во время свое, и лист его не отпадет; и вся, елика аще творит, успеет. Не тако нечестивии, не тако; но яко прах, егоже возметает ветер от лица земли. Сего ради не воскреснут нечестивии на суд, ниже грешницы в совет праведных. Яко весть Господь путь праведных, и путь нечестивых погибнет.

Псалом 2.

Вскую шаташася языцы, и людие поучишася тщетным? Предсташа царие земстии, и князи собрашася вкупе на Господа и на христа его. Расторгнем узы их и отвержем от нас иго их. Живый на небесех посмеется им, и Господь поругается им. Тогда возглаголет к ним гневом своим и яростию своею смятет я; аз же поставлен есмь царь от него над Сионом, горою святою его, возвещаяй повеление Господне. Господь рече ко мне; сын мой еси ты, аз днесь родих тя; проси от мене, и дам ти языки достояние твое, и одержание твое концы земли; упасеши я жезлом железным, яко сосуды скудельничи сокрушиши я. И ныне, царие, разумеите, накажитесь вси судящии земли. Работайте Господеви со страхом, и радуйтеся ему со трепетом. Примите наказание, да не когда прогневается Господь, и погибнете от пути праведнаго, егда возгорится вскоре ярость его; блажени вси надеющиися на^ня.

Псалом 3.

Господи, что ся умножиша стужающии ми? мнози востают на мя, мнози глаголют души моей; несть спасения ему в Бозе его. Ты же, Господи, заступник мой еси, слава моя, и возносяй главу мою. Гласом моим ко Господу возвах, и услыша мя от горы святыя своея. Аз уснух, и спях, востях, яко Господь заступит мя. Не убоюся от тем людий, окрест нападающих на мя. Воскрсни, Господи, спаси мя, Боже мой; яко ты поразил еси вся враждующия ми всуе, зубы грешников сокрушил еси. Господне есть спасение, и на людех твоих благвеніе твое.

Псалом 4.

Внегда призвати ми, услыша мя Бог правды моея; в скорби распространил мя еси; ущедри мя и услыши молитву мою. Сынове человечестіи, доколе тяжкосердіи? вскую любите суету и ищите лжи? И уведите, яко удиви Господь преподобнаго своего. Господь услышит мя, внегда воззвати ми к нему. Гневайтесь, и не согрешайте, яже глаголете в сердцах ваших, на ложах ваших умилитесь; пожрите жертву правды и уповайте на Господа. Мнози глаголют; кто явит нам благая? знаменася на нас свет лица твоего, Господи. Дал еси веселіе в сердцы моем; от плода пшеницы, вина и елеа своего умножишася; в мире вкупе усну и почію, яко ты, Господи, единого на упованіи вселил мя еси.

Псалом 5.

Глаголы моя внуши, Господи, разумей званіе мое. Вонми гласу моленія моего, царю мой и Боже мой; яко к тебе помолюся, Господи. Заутра услыши глас мой; заутра предстану ти, и узриши мя; яко Бог не хотяй беззаконія ты еси; не приселится к тебе лукавнуяй, ниже пребудут беззаконницы пред очима твоима; возненавидел еси вся делающыя беззаконіе. погубиши вся глаголющыя лжу; мужа кровей и льстива гнушается Господь. Аз же множеством милости твоея вниду в дом твой, поклонюся ко храму святому твоему, в страсе твоём. Господи, настави мя правдою твоею, враг моих ради исправи пред тобою путь мой. Яко несть во устех их истины, сердце их суетно, гроб отверст гортань их, языки своими льщаху. Суди им, Боже, да отпадут от мыслей своих; по множеству нечестія их изрини я, яко преогорчиша тя, Господи. И да возвеселятся вси уповающіи на тя, во век возрадуются, и вселишися в них; и похвалятся о тебе любящіи имя твое. Яко ты благословиши праведника, Господи, яко оружіем благоволенія венчал еси нас.

Псалом 6.

Господи, да не яростію твоею обличиши мене, ниже гневом твоим накажеши мене. Помилуй мя, Господи, яко немощен есмь; изцели мя, Господи, яко смятошася кости моя, и душа моя смятется зело; и ты, Господи, доколе? Обратися, Господи, избави душу мою, спаси мя ради млти твоея; яко несть в смерти поминаяй тебе, во аде же кто исповестся тебе? Утрудихся воздыханіем моим, измыю на всяку ноць ложе мое, слезами моими постелю мою омочу. Смятется от ярости око мое, обетшах во всех вразех моих. Отступите от мене, вси делающіи беззаконіе, яко услыша Господь глас плача моего, услыша Господь моленіе мое, Господь молитву мою пріят. Да постыдятся и смятутся вси врази мои, да возвратятся и устыдятся зело вскоре.

Псалом 7.

Господи Боже мой, на тя уповах, спаси мя от всех гонящих мя и избави мя; да не когда похитит яко лев душу мою, не сущу избавляющую, ниже спасающую. Господи Боже мой, аще сотворих сіе, аще есть неправда в

руку мою, аще воздах воздающим ми зла, да отпаду убо от враг моих тощ; да поженет убо враг душу мою, и да постигнет, и поперет в землю живот мой, и славу мою в персть вселит. Воскресни, Господи, гневом твоим, вознесися в концах враг твоих, и востани, Господи Боже мой, повелением, имже заповедал еси, и сонм людий обыдет тя; и о том на высоту обратися. Господь судит людем; суди ми, Господи, по правде моей и по незлобе моей на мя. Да скончается злоба грешных, и исправиши праведнаго, испытай сердца и утробы, Боже, праведно. Помощь моя от Бога, спасающаго правых сердцем. Бог судитель праведн, и крепок, и долготерпелив, и не гнев наводяй на всяк день. Аще не обратитесь, оружие свое очистит, лук свой напряже, и уготова и, и в нем уготова сосуды смертныя, стрелы своя сгараемым содела. Се, боле неправдою, зачат болезнь и роди беззаконие; ров изры и ископа и, и падет в яму, юже содела. Обратится болезнь его на главу его, и на верх его неправда его снидет. Исповемся Господеви по правде его и пою имени Господа вышняго.

Псалом 8.

Господи Господь наш, яко чудно имя твое по всей земли, яко взятся великолепие твое превыше небес. Из уст младенец и ссущих совершил еси хвалу, враг твоих ради, еже разрушити врага и местника. Яко узрю небеса, дела перст твоих, луну и звезды, яже ты основал еси; что есть человек, яко помниши его? или сын челоувечь, яко посещаети его? Умалил еси его малым чим от ангел, славою и честію венчал еси его; и поставил еси его над делаи руку твоею, вся покорил еси под нозе его; овцы и волы вся, еще же и скоты польскія, птицы небесныя и рыбы морскія, преходящія стези морскія. Господи Господь наш, яко чудно имя твое по всей земли.

Псалом 9.

Исповемся тебе, Господи, всем сердцем моим, повем вся чудеса твоя. Возвеселюся и возрадуюся о тебе, пою имени твоему, вышній. Внегда возвратитися врагу моему вспять, изнемогут и погибнут от лица твоего. Яко сотворил еси суд мой и прю мою; сел еси на престоле, судяй правду. Запретил еси языком, и погибе нечестивый; имя его потребил еси в век и в век века. Врагу оскудеша оружія в конец, и грады разрушил еси; погибе память его с шумом. И Господь во век пребывает, уготова на суд престол свой; и той судити имать вселенней в правду, судити имать людем в правоте. И бысть Господь прибежище убогому, помощник во благовременіих, в скорбех. И да уповают на тя знающіи имя твое, яко не оставил еси взыскающих тя, Господи. Пойте Господеви, живущему в Сіоне, возвестите во языцех начинанія его; яко взыскай крови их помяну, не забы званія убогих. Помилуй мя, Господи, виждь смиреніе мое от враг моих, возносяй мя от врат смертных; яко да возведу вся хвалы твоя во вратех дщере Сіони; возрадуемся о спасеніи твоем. Углебоша языцы в пагубе, юже сотвориша; в сети сей, юже скрыша,

увязе нога их. Знаемъ есть Господь судьбы творяй; в делех руку своею увязе грешник. Да возвратятся грешницы во ад, вси языцы забывающіи Бога. Яко не до конца забвен будет нищій, терпеніе убогих не погибнет до конца. Воскрсни, Господи, да не крепится человек, да судятся языцы пред тобою. Постави, Господи, законоположителя над ними, да разумеют языцы, яко человецы суть. Вскую, Господи, отстоя далече, презираеши во благовременіих, в скорбех? Внегда гордится нечестивому, возгарається нищій; увязают в советех, яже помышляют. Яко хвалимъ есть грешный в похотех души своея, и обидяй благословимъ есть. Раздражи Господа грешный; по множеству гнева своего не възыщеть; несть Бога пред ним. Оскверняются путіе его на всяко время; отемлются судьбы твоя от лица его; всеми враги своими обладает. Рече бо в сердца своем; не подвижуся от рода в род без зла; егоже клятвы уста его полна суть, и горести и лъсти; под языком его труд и болезнь. Приседит в ловителстве с богатыми в тайных, еже убити неповиннаго; очи его на нищаго призираете. Ловит в тайне яко лев во ограде своей, ловит еже възхитити нищаго, възхитити нищаго, внегда привлещи и в сети своей. Смирит его; преклонится и падет, внегда ему обладати убогими. Рече бо в сердца своем; забы Бог, отврати лице свое, да не видит до конца. Воскрсни, Господи Боже мой, да вознесется рука твоя, не забуди убогих твоих до конца. Чесо ради прогнева нечестивый Бога? рече бо в сердца своем; не възыщеть. Видиши, яко ты болезнь и ярость смотриаши, да предан будет в руке твои; тебе оставлен есть нищій, сиру ты буди помощник. Сокруши мышцу грешному и лукавому; възыщется грех его и не обрящется. Господь царь во век и в век века; погибнете, языцы, от земли его. Желаніе убогих услышал еси, Господи, уготованію сердца их внят ухо твое. Суди сиру и смирену, да не приложит ктому величатися человек на земли.

Псалом 10.

На Господа уповах, како речете души моея; превитай по горам, яко птица? Яко се, грешницы налякоша лук, уготоваша стрелы в туле, состреляти во мраце правыя сердцем. Зане яже ты совершил еси, они разрушиша; праведник же что сотвори? Господь во храме святем своем. Господь, на небеси пртол его; очи его на нищаго призираете, вежди его испытаете сыны человеческія. Господь испытает праведнаго и нечестиваго; любяй же неправду ненавидит свою душу. Ождит на грешники сети; огонь и жупел, и дух бурен часть чаши их. Яко праведн Господь и правды возлюби; правоты виде лице его.

Псалом 11.

Спаси мя, Господи, яко оскуде преподобный; яко умалишася истины от сынов человеческих. Суетная глагола кійждо ко искреннему своему; устне льстивыя в сердца, и в сердца глаголаша злая. Потребит Господь вся устны льстивыя, язык велеречивый, рекшыя; язык наш возвеличим, устны наша при нас суть; кто нам Господь есть? Страсти ради нищих и

воздыханія убогих ныне воскресну, глет Господь; положуся во спасеніе, не обинюся о нем. Слова Господня слова чиста, сребро разжжено, искушено земли, очищено седмерицею. Ты, Господи, сохраниши ны и соблюдеши ны от рода сего и во век. Окрест нечестивіи ходят; по высоте твоей умножил еси сыны человеческія.

Псалом 12.

Доколе, Господи, забудеши мя до конца? доколе отвращаеши лице твое от мене? Доколе положу советы в души моей, болезни в сердца моем день и ночь? доколе вознесется враг мой на мя? Призри, услыши мя, Господи Боже мой; просвети очи мои, да не когда усну в смерть; да не когда речет враг мой; укрепихся на него. Стужающіи ми возрадуются, аще подвижуся. Аз же на млтв твою уповах; возрадуется сердце мое о спасеніи твоем; воспую Господеви благодѣявшему мне и пою имени Господа вышняго.

Псалом 13.

Рече безумен в сердца своем; несть Бог. Растлеша и омерзишася в начинаніих; несть творяй благостыню. Господь с небесе приниче на сыны человеческія, видети, аще есть разумевай, или зыскай Бога. Все уклонишася, вкупе неключими быша; несть творяй благостыню, несть до единого. Ни ли уразумеют все делающіи беззаконіе, снѣдающіи люди моя в снѣдъ хлеба? Господа не призваша. Тамо убояшася страха, идеже не бе страх; яко Господь в роде праведных. Совет нищаго посрамисте; Господь же упованіе его есть. Кто даст от Сіона спасеніе Израилево? Внегда возвратит Господь плененіе людій своих, возрадуется іаков, и возвеселится Израиль.

Псалом 14.

Господи, кто обитает в жилищи твоем? или кто вселится во святую гору твою? Ходяй непорочен и делаяй правду, глаголяй истину в сердца своем; иже не ульсти языком своим и не сотвори искреннему своему зла, и поношенія не пріят на ближнія своя; уничижен есть пред ним лукавнуй, боящыяжеса Господа славит; кленыйся искреннему своему и не отменяся; сребра своего не даде в лихву и мзды на неповинных не пріят. Творяй сія не подвижится во век.

Псалом 15.

Сохрани мя, Господи, яко на тя уповах. Рех Господеви; Господь мой еси ты, яко благих моих не требуеши. Святым, иже суть на земли его, удиви Господь вся хотенія своя в них. Умножишася немощи их, по сих ускориша; не соберу соборы их от кровей, ни помяну же имен их устнама моима. Господь часть достоянія моего и чаши моя; ты еси устраяяй достояніе мое мне. Ужя нападоша ми в державных моих; ибо достояніе мое державно есть мне. Благословлю Господа вразумившаго мя; еще же

и до ноши наказаша мя утробы моя. Предзрех Господа предо мною выну, яко одесную мене есть, да не подвижуся. Сего ради возвеселися сердце мое, и возрадовася язык мой; еще же и плоть моя вселится на упованіи. Яко не оставиши душу мою во аде, ниже даси преподобному твоему видети истленія. Сказал ми еси пути живота; исполниши мя веселія с лицем твоим; красота в деснице твоей в конец.

Псалом 16.

Услыши, Господи, правду мою, вонми моленію моему, внуши молитву мою не во устах льстивых. От лица твоего судьба моя изыдет; очи мои да видита правоты. Искусил еси сердце мое, посетил еси нощю; искусил мя еси, и не обретеса во мне неправда. Яко да не возглаголют уста моя дел человеческих, за словеса устен твоих аз сохраних пути жестоки. Соверши стопы моя во стезях твоих, да не подвижутся стопы моя. Аз возвах, яко услышал мя еси, Боже; приклони ухо твое мне и услыши глаголы моя. Удиви млти твоя, спасаяй уповающя на тя от противящихся деснице твоей; сохрани мя, Господи, яко зеницу ока; в крове крилу твоею покрыеши мя от лица нечестивых обидящих мя; врази мои душу мою одержаша тук свой затвориша, уста их глаголаша гордыню. Изгонящїи мя ныне обыдоша мя, очи свои возложиша уклонити на землю. Обяша мя яко лев готов на лов и яко скимен обитаяй в тайных. Воскресни, Господи, предвари я и запни им; избави душу мою от нечестиваго, оружие твое от враг руки твоея, Господи, от малых от земли; раздели я в животе их, и сокровенных твоих исполнися чрево их; насытятся сынов, и оставиша останки младенцем своим. Аз же правдою явлюся лицу твоему, насыщуся, внемда явитимися славе твоей.

Псалом 17.

Возлюблю тя, Господи, крепосте моя; Господь утверждєніе мое, и прибежище мое, и избавитель мой, Бог мой, помощник мой, и уповаю на него; защититель мой, и рог спасенія моего, и заступник мой. Хваля призову Господа и от враг моих спасуся. Одержаша мя болезни смертныя, и потоцы беззаконія смятоша мя; болезни адовы обыдоша мя, предвариша мя сети смертныя. И внемда скорбети ми, призвах Господа и к Богу моему возвах; услыша от храма святаго своего глас мой, и вопль мой пред ним внидет во уши его. И подвижєся и трепетна бысть земля, и основанія гор смятошася и подвигошася, яко прогнеवासя на ня Бог. Взыде дым гневом его, и огонь от лица его воспламенится; угліе возгорєся от него. И приклони небеса и сниде, и мрак под ногама его. И взыде на херувїмы и лете, лете на крилу ветреню. И положи тму закров свой; окрест его селєніе его; темна вода во облацех воздушных. От облистанія пред ним облацы проидоша, град и угліе огненное. И возгреме с небесе Господь, и вышній даде глас свой. Низпосла стрелы и разгна я, и молніи умножи и смяте я. И явишася источницы водніи, и открышася основанія вселенныя от запрещенія твоего, Господи, от дохновенія духа гнева твоего. Низпосла с высоты и прїят мя, воспрїят мя от вод многих.

Избавит мя от врагов моих сильных и от ненавидящих мя; яко утвердишася паче мене. Предвариша мя в день озлобленія моего; и бысть Господь утверждене мое. И изведе мя на широту; избавит мя, яко восхоте мя. И воздаст ми Господь по правде моей, и по чистоте руку моею воздаст ми, яко сохраних пути Господни и не нечествовах от Бога моего. Яко вся судьбы его предо мною, и оправданія его не отступиша от мене. И буду непорочен с ним и сохранюся от беззаконія моего. И воздаст ми Господь по правде моей и по чистоте руку моею пред очима его. С преподобным преподобен будеши, и с мужем неповинным неповинен будеши, и со избранным избран будеши, и со строптивым развратишия. Яко ты люди смиренныя спасеши и очи гордых смириши. Яко ты просветиши светилник мой, Господи; Боже мой, просветиши тму мою. Яко тобою избавлюся от искушенія, и Богом моим преиду стену. Бог мой, непорочен путь его; словеса Господня разжжена. Защититель есть всех уповающих на него. Яко кто Бог, разве Господа? или кто Бог, разве Бога нашего? Бог препоясуяй мя силою, и положи непорочен путь мой; совершай нозе мои яко елени, и на высоких поставляяй мя; научаяй руце мои на брань, и положил еси лук медян мышца моя; и дал ми еси защищеніе спасенія, и десница твоя воспріят мя; и наказаніе твое исправит мя в конец, и наказаніе твое то мя научит. Уширил еси стопы моя подо мною, и не изнемогосте плесне мои. Пожену враги моя, и постигну я, и не возвращуся, дондеже скончаются; оскорблю их, и не возмогут стати, падут под ногама моима. И препоясал мя еси силою на брань, спял еси вся востающыя на мя под мя. И врагов моих дал ми еси хребет и ненавидящыя мя потребил еси. Возваша, и не бе спасаяй; ко Господу, и не услыша их. И истню я яко прах пред лицом ветра, яко брение путей поглажду я. Избавиши мя от пререканія людій; поставиши мя во главу языков; людіе, ихже не ведех, работаша ми, в слух уха послушаша мя. Сынове чуждіи солгаша ми, сынове чуждіи обетшаша и охромаша от стезь своих. Жив Господь, и благословен Бог, и да вознесетя Бог спасенія моего, Бог даяй отмщеніе мне и покоривый люди под мя, избавитель мой от враг моих гневливых; от востающих на мя вознесеши мя, от мужа неправедна избавиши мя. Сего ради исповемя тебе во языцех, Господи, и имени твоему пою; величаяй спасенія царева и творяй милость хрісту своему Давиду и семени его до века.

Псалом 18.

Небеса поведают славу Божию, твореніе же руку его возвещает твердь. День дни отрыгает глагол, и ночь ночи возвещает разум. Не суть речи, ниже словеса, ихже не слышатся гласи их. Во всю землю изыде вещаніе их, и в концы вселенныя глаголы их; в солнце положи селеніе свое; и той яко жених исходяй от чертога своего, возрадуется яко исполин тещи путь. От края небесе исход его, и сретеніе его до края небесе; и несть, иже укрыется теплоты его. Закон Господень непорочен, обращаяй души; свидетелство Господне верно, умудряющее младенцы. Оправданія

Господня права, веселящая сердце; заповедь Господня светла, просвещающая очи. Страх Господень чист, пребываяй в век века; судьбы Господни истинны, оправданны вкупе, вожделенны паче злата и камене честна многа, и слаждша паче меда и сота. Ибо раб твой хранит я; внемгда сохранити я, воздаяніе много. Грехопаденія кто разумеет? от тайных моих очти мя, и от чуждых пощади раба твоего; аще не обладают мною, тогда непорочен буду, и очищуся от греха велика. И будут во благоволеніе словеса уст моих, и поученіе сердца моего пред тобою выну, Господи, помощниче мой и избавителю мой.

Псалом 19.

Услышит тя Господь в день печали, защитит тя имя Бога іаковля. Послет ти помощь от святого, и от Сіона заступит тя. Помянет всяку жертву твою, и всесожженіе твое тучно буди. Даст ти Господь по сердцу твоему, и весь совет твой исполнит. Возрадуемся о спасеніи твоем, и во имя Господа Бога нашего возвеличимся; исполнит Господь вся прошенія твоя. Ныне познах, яко спасе Господь хріста своего; услышит его с небесе святого своего; в силах спасеніе десницы его. Сіи на колесницах, и сіи на конех; мы же во имя Господа Бога нашего призовем. Тіи спяти быша и падоша; мы же востяхом и исправихомся. Господи, спаси царя, и услыши ны, в оньже аще день призовем тя.

Псалом 20.

Господи, силою твоею возвеселится царь, и о спасеніи твоем возрадуется зело. Желаніе сердца его дал еси ему, и хотенія устну его неси лишил его. Яко предварил еси его благвеніем благостынным, положил еси на главе его венец от камене честна. Живота просил есть у тебе, и дал еси ему долготу дній во век века. Велія слава его спасеніем твоим; славу и велелепіе возложиши на него. Яко даси ему благвеніе во век века; возвеселиши его радостію с лицом твоим. Яко царь уповает на Господа, и милостію вышняго не подвижится. Да обрящется рука твоя всем врагом твоим, десница твоя да обрящет вся ненавидящыя тебе. Яко положиши их яко печь огненную во время лица твоего; Господь гневом своим смятет я, и снесет их огонь. Плод их от земли погубиши, и семя их от сынов человеческих. Яко уклониша на тя злая, помыслиша советы, ихже не возмогут составить. Яко положиши я хребет; во избытцех твоих уготовиши лице их. Вознесися, Господи, силою твоею; воспоем и поем силы твоя.

Псалом 21.

Боже, Боже мой, вонми ми, вскую оставил мя еси? далече от спасенія моего словеса грехопаденій моих. Боже мой, воззову во дни, и не услышиши, и в ночи, и не в безуміе мне. Ты же во святем живеши, хвало Израилева. На тя уповаша отцы наши; уповаша, и избавил еси я; к тебе возваша, и спасошася; на тя уповаша, и не постыдешася. Аз же есмь

червь, а не человек, поношение человеков и уничижение людей. Все видящие меня поругашаются, глаголаша устнами, покиваша главою; упова на Господа, да избавит его, да спасет его, яко хочет его. Яко ты еси исторгий мя из чрева, упование мое от сосца матере моея. К тебе привержен есмь от ложесн, от чрева матере моея Бог мой еси ты. Да не отступиши от мене, яко скорбь близ, яко несть помогаяй ми. Обыдоша мя телцы мнози, юнцы тучнии одержаша мя; отверзоша на мя уста своя, яко лев восхищай и рыкай. Яко вода изліяхся, и разсыпашася вся кости моя; бысть сердце мое яко воск таяй посреде чрева моего. Изсше яко скудель крепость моя, и язык мой прильпе гортани моему, и в персть смерти свел мя еси. Яко обыдоша мя пси мнози, сонм лукавых одержаша мя; ископаша руце мои и нозе мои. Исчетоша вся кости моя; ти же смотриша и презреша мя. Разделиша ризы моя себе, и о одежди моей меташа жребій. Ты же, Господи, не удали помощь твою от мене; на заступление мое вонми. Избави от оружія душу мою, и из руки песи однородную мою. Спаси мя от уст львовых, и от рог единорожь смирение мое. Повем имя твое братіи моеи, посреде церкви воспою тя. Боящіися Господа, восхвалите его, все семя іаковле, прославите его, да убоится же от него все семя Израилево; яко не уничижи, ниже негодова молитвы нищаго, ниже отврати лице свое от мене, и егда воззвах к нему, услыша мя. От тебе похвала моя, в церкви велицей исповемся тебе; молитвы моя воздам пред боящимися его. Ядят убозіи, и насытятся, и восхвалят Господа взыскающіи его; жива будут сердца их в век века. Помянутся и обратятся ко Господу вси концы земли, и поклонятся пред ним вся отечествія язык; яко Господне есть царствие, и той обладает языки. Ядоша и поклонишася вси тучнии земли; пред ним припадут вси низходящіи в землю; и душа моя тому живет. И семя мое поработает ему; возвестит Господеви род грядущій; И возвестят правду его людем рождшымся, яже сотвори Господь.

Псалом 22.

Господь пасет мя, и ничтоже мя лишит. На месте злачне, тамо всели мя, на воде покойне воспита мя. Душу мою обрати, настави мя на стези правды, имене ради своего. Аще бо и пойду посреде сени смертныя, не убоюся зла, яко ты со мною еси; жезл твой и палица твоя, та мя утешиста. Уготовал еси предо мною трапезу против стужающим мне; умастил еси елеом главу мою, и чаша твоя упояваючи мя, яко державна. И милость твоя поженет мя вся дни живота моего, и еже вселитимся в дом Господень в долготу дній.

Псалом 23.

Господня земля, и исполнение ея, вселенная и вси живущіи на ней. Той на морях основал ю есть и на реках уготовал ю есть. Кто взыдет на гору Господню? или кто станет на месте святем его? Неповинен рукама и чист сердцем, иже не пріят всуе душу свою и не клятсся лестію искреннему своему; сей пріимет благовение от Господа и милостыню от

Бога спаса своего. Сей род ищущих Господа, ищущих лице Бога іаковля. Возмите врата князи ваша, и возмיתесь врата вечная; и внидет царь славы. Кто есть сей царь славы? Господь крепок и силен, Господь силен в брани. Возмите врата князи ваша, и возмיתесь врата вечная; и внидет царь славы. Кто есть сей царь славы? Господь сил, той есть царь славы.

Псалом 24.

К тебе, Господи, воздвигох душу мою, Боже мой, на тя уповах, да не постыжуся во век, ниже да посмеютмися врази мои; ибо вси терпящїи тя не постыдятся. Да постыдятся беззаконнующїи вотще. Пути твоя, Господи, скажи ми и стезям твоим научи мя. Настави мя на истину твою и научи мя; яко ты еси Бог спас мой, и тебе терпех весь день. Помяни щедроты твоя, Господи, и млти твоя, яко от века суть. Грех юности моея и неведения моего не помяни; по млти твоей помяни мя ты, ради благодсти твоя, Господи. Благ и прав Господь, сего ради законоположит согрешающим на пути. Наставит кроткія на суд, научит кроткія путем своим. Вси путіе Господни милость и истина, взыскающим завета его и свиденія его. Ради имене твоего, Господи, и очти грех мой, мног бо есть. Кто есть человек бояйся Господа? законоположит ему на пути, егоже изволи. Душа его во благих водворится, и семя его наследит землю. Держава Господь боящихся его, и завет его явит им. Очи мои выну ко Господу, яко той исторгнет от сети нозе мои. Призри на мя и помилуй мя, яко единород и нищъ есмь аз. Скорби сердца моего умножишася, от нужд моих изведи мя. Виждь смиреніе мое и труд мой, и остави вся грехи моя. Виждь враги моя, яко умножишася, и ненавиденіем неправедным возненавидеша мя. Сохрани душу мою и избави мя, да не постыжуся, яко уповах на тя. Незлобивїи и правїи прилепляхуся мне, яко потерпех тя, Господи. Избави, Боже, Израиля от всех скорбей его.

Псалом 25.

Суди ми, Господи, яко аз незлобою моею ходих; и на Господа уповая не изнемогу. Искуси мя, Господи, и испытай мя, разжжи утробы моя и сердце мое. Яко млтѣ твоя пред очима моима есть, и благоугодих во истине твоей. Не седох с сонмом суетным, и со законопреступными не вниду. Возненавидех церковь лукавнующих, и с нечестивыми не сяду. Умыю в неповинных руце мои, и обыду жертвенник твой, Господи, еже услышати ми глас хвалы твоя и поведати вся чудеса твоя. Господи, возлюбих благолепіе дому твоего и место селенія славы твоя. Да не погубиши с нечестивыми душу мою и с мужи кровей живот мой, ихже в руку беззаконія, десница их исполнися мзды. Аз же незлобою моею ходих; избави мя, Господи, и помилуй мя. Нога моя ста на правоте; в церквах благословлю тя, Господи.

Псалом 26.

Господь просвещеніе мое и спаситель мой, кого убоюся? Господь

защититель живота моего, от кого утрашуся? Внегда приблизитися на мя злобующим, еже снести плоти моя, оскорбляющіи мя и врази мои, тіи изнемогоша и падоша. Аще ополчится на мя полк, не убоится сердце мое; аще востанет на мя брань, на него аз уповаю. Едино просих от Господа, то взыщу; еже жити ми в дому Господни вся дни живота моего, зрети ми красоту Господню и посещати храм святой его. Яко скры мя в селении своем в день зол моих, покры мя в тайне селения своего, на камень вознесе мя. И ныне се, вознесе главу мою на враги моя; обыдох и пожрох в селении его жертву хваления и воскликновения; пою и воспою Господеви. Услыши, Господи, глас мой, имже воззвах, помилуй мя и услыши мя. Тебе рече сердце мое; Господа взыщу, взыска тебе лице мое, лица твоего, Господи, взыщу. Не отврати лица твоего от мене и не уклонися гневом от раба твоего; помощник мой буди, не отрини мене и не остави мене, Боже, спасителю мой. Яко отец мой и мати моя остависта мя, Господь же воспріят мя. Законоположи ми, Господи, в пути твоём, и настави мя на стезю правую враг моих ради. Не предаждь мене в души стужающих ми; яко восташа на мя свидетеле неправеднии, и солга неправда себе. Верую видети благая Господня на земли живых. Потерпи Господа, мужайся, и да крепится сердце твое, и потерпи Господа.

Псалом 27.

К тебе, Господи, воззову, Боже мой; да не премолчиши о мене; да не когда премолчиши о мене, и уподоблюся низходящым в ров. Услыши, Господи, глас моления моего, внегда молитимися к тебе, внегда воздети ми руки мои ко храму святому твоему. Не привлецы мене со грешники, и с делающими неправду не погуби мене, глаголющими мир с ближними своими, злая же в сердцах своих. Дажь им, Господи, по делом их и по лукавству начинаний их, по делом руку их даждь им, воздаждь воздаяние им. Яко не разумеша в дела Господня и в дела руку его; разориши я и не созиждеша я. Благословен Господь, яко услыша глас моления моего. Господь помощник мой и защититель мой; на него упова сердце мое, и поможе ми, и процвете плоть моя; и волею моею исповемся ему. Господь утверждение людей своих и защититель спасений христа своего есть. Спаси люди твоя, и благослови достояние твое, и упаси я, и вознеси я до века.

Псалом 28.

Принесите Господеви, сынове Божіи, принесите Господеви сыны овни, принесите Господеви славу и честь; принесите Господеви славу имени его; поклонитесь Господеви во дворе святем его. Глас Господень на водах, Бог славы возгреме, Господь на водах многих. Глас Господень в крепости, глас Господень в великолепии. Глас Господа, сокрушающаго кедры; и стрьет Господь кедры ливанскія, и истнит я яко телца ливанска; и возлюбленный яко сын единорожь. Глас Господа, пресецающаго пламень огня. Глас Господа, стрясающаго пустыню; и стрясет Господь

пустыню каддійскую. Глас Господень, свершающій елени, и открыет дубравы; и в храме его всякій глаголет славу. Господь потоп населяет, и сядет Господь царь в век. Господь крепость людям своим даст, Господь благословит люди своя миром.

Псалом 29.

Вознесу тя, Господи, яко подял мя еси, и не возвеселил еси врагов моих о мне. Господи Боже мой, воззвах к тебе, и исцелил мя еси. Господи, возвел еси от ада душу мою, спасл мя еси от низходящих в ров. Пойте Господеви, преподобнии его, и исповедайте память святыни его; яко гнев в ярости его, и живот в воли его; вечер водворится плачь, и завтра радость. Аз же рех во обилии моем; не подвижуся во век. Господи, волею твоею подаждь доброте моей силу; отвратил же еси лице твое, и бых смущен. К тебе, Господи, воззову, и к Богу моему помолюся. Кая польза в крови моей, внегда сходити ми во истление? еда исповестся тебе персть? или возвестит истину твою? Слыша Господь и помилова мя; Господь бысть помощник мой. Обратил еси плачь мой в радость мне, растерзал еси вретиче мое и препоясал мя еси веселием, яко да воспоеет тебе слава моя, и не умилюся. Господи Боже мой, во век исповемся тебе.

Псалом 30.

На тя, Господи, уповах, да не постыжуся во век; правдою твоею избави мя и изми мя. Приклони ко мне ухо твое, ускори изяти мя; буди ми в Бога защитителя и в дом прибежища, еже спасти мя. Яко держава моя и прибежище мое еси ты; и имене твоего ради наставиши мя и препитаеши мя. Изведеши мя от сети сея, юже скрыша ми; яко ты еси защититель мой, Господи. В руке твои предложу дух мой; избавил мя еси, Господи Боже истины. Возненавидел еси хранящия суеты вотще; аз же на Господа уповах. Возрадуюся и возвеселюся о милости твоей, яко призрел еси на смирение мое, спасл еси от нужд душу мою и неси мене затворил в руках вражних, поставил еси на пространне нозе мои. Помилуй мя, Господи, яко скорблю; смятеся яростию око мое, душа моя и утроба моя. Яко исчезе в болезни живот мой, и лета моя в въздыханих; изнеможе нищетою крепость моя, и кости моя смятошася. От всех враг моих бых поношение, и соседом моим зело, и страх знаемым моим; видящии мя вон бежаша от мене. Забвен бых яко мертв от сердца; бых яко сосуд погублен. Яко слышах укорение многих живущих окрест; внегда собратися им вкупе на мя, пріяти душу мою совещаща. Аз же на тя, Господи, уповах, рех; ты еси Бог мой. В руку твоею жребіи мои; избави мя из руки враг моих и от гонящих мя. Просвети лице твое на раба твоего; спаси мя милостию твоею. Господи, да не постыжуся, яко призвах тя; да постыдятся нечестивіи, и снудут во ад. Немы да будут устны льстивыя, глаголющия на праведнаго беззаконіе, гордынею и уничиженіем. Коль многое множество благости твоея, Господи, юже скрыл еси боящимся тебе, соделал еси уповающим на тя, пред сыны человеческими; скроеши их в тайне лица твоего от мятежа человеческого,

покрыеши их в крове от пререканія язык. Благословен Господь, яко удиви милость свою во граде огражденія. Аз же рех во изступленіи моем; отвержен есмь от лица очію твоею; сего ради услышал еси глас молитвы моя, внемда воззвах к тебе. Возлюбите Господа, вси преподобніи его; яко истины взыскает Господь и воздает излише творящим гордыню. Мужайтесь, и да крепится сердце ваше, вси уповающіи на Господа.

Псалом 31.

Блажени, ихже оставишася беззаконія, и ихже прикрывшася греси. Блажен муж, емуже не вменит Господь греха, ниже есть во устех его лесь. Яко умолчах, обетшаша кости моя, от еже звати ми весь день, яко день и ночь отяготе на мне рука твоя; возвратихся на страсть, егда унзе ми терн. Беззаконіе мое познах и греха моего не покрых, рех; исповем на мя беззаконіе мое Господеви; и ты оставил еси нечестіе сердца моего. За то помолится к тебе всяк преподобный во время благопотребно; обаче в потопе вод многих к нему не приближатся. Ты еси прибежище мое от скорби обдержаша мя; радости моя, избави мя от обышедших мя. Вразумлю тя, и наставлю тя на путь сей, в оньже пойдеш; утвержу на тя очи мои. Не будите яко конь и меск, имже несть разума; броздами и уздою челюсти их востягнеши, не приближающихся к тебе. Многи раны грешному; уповающего же на Господа милость обыдет. Веселитесь о Господе и радуйтеся праведніи, и хвалитесь, вси правіи сердцем.

Псалом 32.

Радуйтеся, праведніи, о Господе; правым подобает похвала. Исповедайтесь Господеви в гуслах, во псалтири десятоструннем пойте ему; воспойте ему песнь нову, добре пойте ему со восклицаніем; яко право слово Господне, и вся дела его в вере. Любит милостыню и суд Господь, милости Господни исполнь земля. Словом Господним небеса утвердишася, и дхом уст его вся сила их; собираяй яко мех воды морскія, полагаяй в сокровищих бездны. Да убоится Господа вся земля, от негоже да подвижутся вси живущіи по вселенней; яко той рече, и быша; той повеле, и создашася. Господь разоряет советы языков, отметае же мысли людій и отметае советы князей. Совет же Господень во век пребывает, помышленія сердца его в род и род. Блажен язык, емуже есть Господь Бог его, людіе, яже избра в наследіе себе. С небесе призре Господь, виде вся сыны человеческія; от готоваго жилища своего призре на вся живущія на земли; создавый на едине сердца их, разумеваыя на вся дела их. Не спасается царь многою силою, и исполин не спасется множеством крепости своея. Ложь конь во спасеніе, во множестве же силы своея не спасется. Се, очи Господни на боящыяся его, уповающыя на милость его; избавити от смерти души их, и препитати я в глад. Душа же наша чаеет Господа, яко помощник и защититель наш есть; яко о нем возвеселится сердце наше, и во имя святое его уповахом. Буди, Господи, милость твоя на нас, якоже уповахом на тя.

Псалом 33.

Благословлю Господа на всякое время, выну хвала его во устех моих. О Господе похвалится душа моя; да услышат кротцыи и возвеселятся. Возвеличите Господа со мною, и вознесем имя его вкупе. Взысках Господа, и услыша мя и от всех скорбей моих избави мя. Приступите к нему и просветитесь, и лица ваша не постыдятся. Сей нищій воззва, и Господь услыша и, и от всех скорбей его спасе и. Ополчится ангел Господень окрест боящихся его и избавит их. Вкусите и видите, яко благ Господь; блажен муж, иже уповае на нѣ. Бойтесь Господа, вси святіи его, яко несть лишенія боящимся его. Богатіи обнищаша и взалкаша; взыскающіи же Господа не лишатся всякаго блага. Приидите, чада, послушайте мене, страху Господню научу вас. Кто есть человек хотяй живот, любяй дни видети блага? Удержи язык твой от зла и устне твои, еже не глаголати лести. Уклонися от зла и сотвори благо; взыщи мира и пожени и. Очи Господни на праведныя, и уши его в молитву их. Лице же Господне на творящыя злая, еже потребити от земли память их. Возваша праведніи, и Господь услыша их и от всех скорбей их избави их. Близ Господь сокрушенных сердцем, и смиренныя духом спасет. Многи скорби праведным, и от всех их избавит я Господь. Хранит Господь вся кости их, ни едина от них сокрушится. Смерть грешников люта, и ненавидящіи праведнаго прегрешат. Избавит Господь души раб своих, и не прегрешат вси уповающіи на него.

Псалом 34.

Суди, Господи, обидящыя мя, побори борющыя мя. Приими оружіе и щит и востани в помощь мою; изсуни мечь и заключи сопротив гонящих мя; рцы души моей; спасеніе твое есмь аз. Да постыдятся и посрамятся ищущіи душу мою, да возвратятся вспять и постыдятся мыслящіи ми злая. Да будут яко прах пред лицем ветра, и ангел Господень оскорбляя их; да будет путь их тма и ползок, и ангел Господень погоняяй их; яко туне скрыша ми пагубу сети своея, всеу поносиша души моей. Да приидет ему сеть, юже не весть, и ловитва, юже скры, да обымет и, и в сеть да впадет в ню. Душа же моя возрадуется о Господе, возвеселится о спасеніи его. Вся кости моя рекут; Господи, Господи, кто подобен тебе? избавляяй нища из руки крепльших его, и нища, и убога от расхищающих его. Воставше на мя свидетеле неправедніи, яже не ведях, вопрошаху мя. Воздаша ми лукавая воз благая, и безчадіе души моей. Аз же, внегода они стужаху ми, облачахся во вретиче и смирях постом душу мою, и молитва моя в недро мое возвратится. Яко ближнему, яко брату нашему, тако угождах; яко плача и сетуя, тако смиряхся. И на мя возвеселишася и собращася; собращася на мя раны, и не познах; разделишася, и не умилишася. Искусиша мя, подражниша мя подражненіем, поскрежеташа на мя зубы своими. Господи, когда узриши? устрой душу мою от злодейства их, от лев едиnorodную мою. Исповемся тебе в церкви мнозе, в людех тяжцех восхваляю тя. Да не возрадуются о мне враждующіи ми неправедно, ненавидящіи мя туне и

помизаючі очима; яко мне убо мирная глаголаху, и на гнев лести помышляху. Разшириша на мя уста своя, реша; благоже, благоже, видеша очи наши. Видел еси, Господи, да не премолчиши; Господи, не отступи от мене. Востани, Господи, и вонми суду моему, Боже мой и Господи мой, на прю мою. Суди ми, Господи, по правде твоей, Господи Боже мой, и да не возрадуются о мне. Да не рекут в сердцах своих; благоже, благоже души нашей; ниже да рекут; пожрохом его. Да постыдятся и посрамятся вкупе радующіся злом моим; да облекутся в студ и срам велеречующі на мя. Да возрадуются и возвеселятся хотящі правды моя; и да рекут выну, да возвеличится Господь, хотящі мира рабу его. И язык мой поучится правде твоей, весь день хвале твоей.

Псалом 35.

Глаголет пребеззаконный согрешати в себе; несть страха Божія пред очима его; яко ульсти пред ним обрести беззаконіе свое, и возненавидети. Глаголы уст его беззаконіе и лесь; не восхоте разумети еже ублажити. Беззаконіе помысли на ложи своем; предста всякому пути неблагу, о злобе же не негодова. Господи, на небеси милость твоя, и истина твоя до облак; правда твоя яко горы Божія, судьбы твоя бездна многа; человеки и скоты спасеши, Господи. Яко умножил еси милость твою, Боже; сынове же человечестіи в крове крилу твоею надеяться имут. Упійются от тука дому твоего, и потоком сладости твоя напоиши я. Яко у тебе источник живота, во свете твоем узрим свет. Пробави милость твою ведущим тя и правду твою правым сердцем. Да не приидет мне нога гордыни, и рука грешнича да не подвижит мене. Тамо падоша вси делающі беззаконіе; изриновени быша, и не возмогут стати.

Псалом 36.

Не ревнуй лукавнующим, ниже завиди творящим беззаконіе. Зане яко трава скоро изсхнут, и яко зеліе злака скоро отпадут. Уповай на Господа и твори благостыню; и насели землю, и упасешися в богатстве ея. Насладися Господеви, и даст ти прошенія сердца твоего. Открой ко Господу путь твой и уповай на него, и той сотворит. И изведет яко свет правду твою и судьбу твою яко полудне. Повинися Господеви и умоли его. Не ревнуй спящему в пути своем, человеку творящему законопреступленіе. Престани от гнева и остави ярость; не ревнуй, еже лукавновати, зане лукавнующі потребятся, терпящі же Господа, ті наследят землю. И еще мало, и не будет грешника; и взыщеша место его и не обрящеша. Кротцыи же наследят землю и насладятся о множестве мира. Назирает грешный праведнаго и поскрежешет нань зубы своими; Господь же посмеется ему, зане прозирает, яко приидет день его. Мечь извлекоша грешницы, напрягоша лук свой, низложити убога и нища, заклати правыя сердцем. Мечь их да внидет в сердца их, и луцы их да сокрушатся. Лучше малое праведнику, паче богатства грешных многа. Зане мышцы грешных сокрушатся, утверждает же праведныя Господь. Весть Господь пути непорочных, и достояніе их в век будет. Не

постыдятся во время лютое и во днех глада насытятся, яко грешницы погибнут. Врази же Господни, купно прославится им и вознесится, исчезающе яко дым исчезоша. Заемлет грешный и не возвратит; праведный же щедрит и дает. Яко благословящии его наследят землю, кленущии же его потребятся. От Господа стопы человеку исправляются, и пути его восхощет зело. Егда падет, не разбьется, яко Господь подкрепляет руку его. Юнейший бых, ибо состарехся, и не видех праведника оставлена, ниже семене его просяща хлебы. Весь день милует и взаим дает праведный, и семя его во благословение будет. Уклонися от зла и сотвори благо, и вселися в век века. Яко Господь любит суд и не оставит преподобных своих; во век сохраняются; беззаконницы же изженутся, и семя нечестивых потребится. Праведницы же наследят землю и вселятся в век века на ней. Уста праведнаго поучатся премудрости, и язык его возглаголет суд. Закон Бога его сердца его, и не запнутся стопы его. Смотряет грешный праведнаго и ищет еже умертвити его; Господь же не оставит его в руку его, ниже осудит его, егда судит ему. Потерпи Господа и сохрани путь его, и вознесет тя еже наследити землю; внегда потребятся грешником, узриши. Видех нечестиваго превозносящася и высящася яко кедры ливанскія; и мимо идох, и се, не бе, и взысках его, и не обретеса место его. Храни незлобие и виждь правоту, яко есть останок человеку мирну. Беззаконницы же потребятся вкупе; останцы же нечестивых потребятся. Спасение же праведных от Господа, и защититель их есть во время скорби; и поможет им Господь и избавит их, и измет их от грешник и спасет их, яко уповаша на него.

Псалом 37.

Господи, да не яростию твоею обличиши мене, ниже гневом твоим накажеши мене; яко стрелы твоя унзоша во мне, и утвердил еси на мне руку твою. Несть изцеления в плоти моей от лица гнева твоего, несть мира в костех моих от лица грех моих. Яко беззакония моя превыдоша главу мою, яко бремя тяжкое отяготеша на мне. Возсмерждеша и согниша раны моя, от лица безумия моего. Пострадах и слякохся до конца, весь день сетуя хождах; яко лядвия моя наполнишася поруганий, и несть изцеления в плоти моей. Озлоблен бых и смирихся до зела, рыках от въздыхания сердца моего. Господи, пред тобою все желание мое, и въздыхание мое от тебе не утаися. Сердце мое смятеса, остави мя сила моя, и свет очию моею, и той несть со мною. Друзи мои и искреннии мои прямо мне приближишася и сташа. И ближнии мои отдалече мене сташа, и нуждахуся ищущии душу мою; и ищущии злая мне глаголаху суетная, и льстивным весь день поучахуся. Аз же яко глух не слышах, и яко нем не отверзаяй уст своих; и бых яко человек не слышай и не имый во устех своих обличения. Яко на тя, Господи, уповах, ты услышиши, Господи Боже мой. Яко рех; да не когда порадуютмися врази мои; и внегда подвижатися ногам моим, на мя велеречеваша. Яко аз на раны готов, и болезнь моя предо мною есть выну. Яко беззаконие мое аз возвещу и

попекуся о гресе моем. Врази же мои живут и укрепятся паче мене, и умножишася ненавидящии мя без правды; воздающии ми злая воз благая оболгаху мя, зане гонях благостыню. Не остави мене, Господи Боже мой, не отступи от мене; вонми в помощь мою, Господи спасения моего.

Псалом 38

Рех; сохраню пути моя, еже не согрешати ми языком моим; положих устом моим хранило, вегда востати грешному предо мною. Онемех и смирихся, и умолчах от благ, и болезнь моя обновися. Согреша сердце мое во мне, и в поучении моем разгорится огонь; глаголах языком моим; скажи ми, Господи, кончину мою и число дний моих, кое есть, да разумею, что лишаюся аз. Се, пяди положил еси дни моя, и состав мой яко ничтоже пред тобою; обаче всяческая суета всяк человек живый. Убо образом ходит человек, обаче все мятется; сокровиществует, и не весть, кому соберет я. И ныне кто терпение мое? не Господь ли? и состав мой от тебе есть. От всех беззаконий моих избави мя; поношение безумному дал мя еси. Онемех и не отверзох уст моих, яко ты сотворил еси. Отстави от мене раны твоя; от крепости бо руки твоя аз исчезох. Во обличеніих о беззаконіи наказал еси человека, и истаял еси яко паучину душу его; обаче все всяк человек. Услыши молитву мою, Господи, и моление мое внуши, слез моих не премолчи; яко преселник аз есмь у тебе и пришлец, якоже вси отцы мои. Ослаби ми, да почию, прежде даже не отиду, и ктому не буду.

Псалом 39.

Терпя потерпех Господа, и внят ми и услыша молитву мою; и возведе мя от рова страстей и от брениа тины, и постави на камени ноге мои и исправи стопы моя; и вложи во уста моя песнь нову, пение Богу нашему. Узрят мнози и убоятся, и уповают на Господа. Блажен муж, емуже есть имя Господне упование его, и не призре в суеты и неистовления ложная. Многа сотворил еси ты, Господи Боже мой, чудеса твоя, и помышлением твоим несть кто уподобится тебе; возвестих и глаголах; умножишася паче числа. Жертвы и приношения не восхотел еси, тело же свершил ми еси; всесожжений и о гресе не взыскал еси. Тогда рех; се, прииду; в главизне книжне писано есть о мне; еже сотворити волю твою, Боже мой, восхотех, и закон твой посреде чрева моего. Благовестих правду в церкви велицей, се, устнам моим не возбраню; Господи, ты разумел еси. Правду твою не скрых в сердца моем, истину твою и спасение твое рех, не скрых милость твою и истину твою от сонма многа. Ты же, Господи, не удали щедрот твоих от мене; милость твоя и истина твоя выну да заступите мя. Яко одержаша мя злая, имже несть числа; постигоша мя беззакония моя, и не возмогох зрети; умножишася паче влас главы моя, и сердце мое остави мя. Благоволи, Господи, избавити мя; Господи, во еже помощи ми, вонми. Да постыдятся и посрамятся вкупе ищущии душу мою, изяти ю; да возвратятся вспять и постыдятся хотящии ми злая. Да примут абие студ свой глаголющии ми; благоже, благоже. Да

возрадуются и возвеселятся о тебе вси ищущи тебе, Господи, и да рекут выну, да возвеличится Господь, любящии спасение твое. Аз же нищ есмь и убог, Господь попечется о мне; помощник мой и защититель мой еси ты, Боже мой, не закосни.

Псалом 40.

Блажен разумевай на нища и убога, в день лют избавит его Господь. Господь да сохранит его и живит его, и да ублажит его на земли и да не предаст его в руки врагов его. Господь да поможет ему на одре болезни его; все ложе его обратил еси в болезни его. Аз рех; Господи, помилуй мя, исцели душу мою, яко согреших ти. Врази мои реша мне злая; когда умрет, и погибнет имя его? И вхождаше видети, всуе глаголаше сердце его; собра беззаконие себе, исхождаше вон и глаголаше вкупе. На мя шептаху вси врази мои, на мя помышляху злая мне. Слово законопреступное возложиша на мя; еда спяй не приложит воскреснути? Ибо человек мира моего, на негоже уповах, ядый хлебы моя, возвеличи на мя запинание. Ты же, Господи, помилуй мя и возстави мя, и воздам им. В сем познах, яко восхотел мя еси, яко не возрадуется враг мой о мне. Мене же за незлобие приял, и утвердил мя еси пред тобою в век. Благословен Господь Бог Израилев от века и до века; буди, буди.

Псалом 41.

Имже образом желает елень на источники водная, сиче желает душа моя к тебе, Боже. Возжада душа моя к Богу крепкому, живому; когда прииду и явлюся лицу Божию? Быша слезы моя мне хлеб день и ночь, внегода глаголатися мне на всяк день; Господе есть Бог твой? Ся помянух, и изліях на мя душу мою; яко пройду в место селения дивна, даже до дому Божия, во гласе радования и исповедания, шума празднующаго. Вскую прискорбна еси, душе моя? и вскую смущаеши мя? уповай на Бога, яко исповемся ему, спасение лица моего и Бог мой. Ко мне самому душа моя смятется; сего ради помянух тя от земли іордански и ермонимски, от горы малыя. Бездна бездну призывает во гласе хлябій твоих; вся высоты твоя и волны твоя на мне преидоша. В день заповесть Господь милость свою, и нощю песнь его у мене, молитва Богу живота моего. Реку Богу; заступник мой еси, почто мя забыл еси? и вскую сетуя хожду, внегода оскорбляет враг? Внегода сокрушатися костем моим, поношаху ми врази мои, внегода глаголати им мне на всяк день; Господе есть Бог твой? Вскую прискорбна еси, душе моя? и вскую смущаеши мя? уповай на Бога, яко исповемся ему, спасение лица моего и Бог мой.

Псалом 42.

Суди ми, Боже, и разсуди прю мою; от языка не преподобна, от человека неправедна и льстива избави мя. Зане ты еси, Боже, крепость моя, вскую отринул мя еси? и вскую сетуя хожду, внегода оскорбляет враг? Посли свет твой и истину твою; та мя настависта, и введоста мя в гору святую

твою и в селенія твоя. И вниду к жертвеннику Божію, к Богу веселящему юность мою; исповемся тебе в гуслах, Боже, Боже мой. Вскую прискорбна еси, душе моя? и вскую смущаеши мя? уповай на Бога, яко исповемся ему, спасеніе лица моего и Бог мой.

Псалом 43.

Боже, ушима нашими услышахом, и отцы наши возвестиша нам дело, еже соделал еси во днех их, во днех древних. Рука твоя языки потреби, и насадил я еси; озлобил еси люди и изгнал еси я. Не бо мечем своим наследил землю, и мышца их не спасе их, но десница твоя и мышца твоя и просвещеніе лица твоего, яко благоволил еси в них. Ты еси сам царь мой и Бог мой, заповедавай спасенія іаковля. О тебе враги наша избодем роги, и о имени твоём уничижим востающыя на ны. Не на лук бо мой уповаю, и мечь мой не спасет мене; спасл бо еси нас от стужающих нам, и ненавидящих нас посрамил еси. О Бозе похвалимся весь день, и о имени твоём исповемся во век. Ныне же отринул еси и посрамил еси нас, и не изыдеши, Боже, в силах наших. Возвратил еси нас вспять при вразех наших, и ненавидящій нас расхищаху себе. Дал еси нас яко овцы снеди, и во языцех разсеял ны еси. Отдал еси люди твоя без цены, и не бе множество в восклицаніих наших. Положил еси нас поношеніе соседом нашим, подражненіе и поруганіе сущым окрест нас. Положил еси нас в притчу во языцех, покиванію главы в людех. Весь день срам мой предо мною есть, и студ лица моего покры мя, от гласа поношающаго и оклеветающаго, от лица вражія и изгоняющаго. Сія вся придоша на ны, и не забудом тебе, и не неправдовахом в завете твоём, и не отступи вспять сердце наше; и уклонил еси стези наша от пути твоего, яко смирил еси нас на месте озлобленія, и прикры ны сень смертная. Аще забудом имя Бога нашего, и аще вздохом руки наша к богу чуждему, не Бог ли възыщет сих? той бо вестъ тайная сердца. Зане тебе ради умерщвляемся весь день, вменихомся яко овцы заколенія. Востани, вскую спиши, Господи? воскресни, и не отрини до конца. Вскую лице твое отвращаеши? забываеши нищету нашу и скорбь нашу? Яко смирился в персть душа наша, прильпе земли утроба наша. Воскрсни, Господи, помози нам, и избави нас имене ради твоего.

Псалом 44.

Отрыгну сердце мое слово благо, глаголю аз дела моя цареви; язык мой трость книжника скорописца. Красен добротою паче сынов человеческих, изліяся благодать во устах твоих; сего ради благослови тя Бог во век. Препояши мечь твой по бедре твоей, сильне, красотою твоею и добротою твоею; и наляцы, и успевай, и царствуй истины ради и кротости и правды; и наставит тя дивно десница твоя. Стрелы твоя изощрены, сильне; людіе под тобою падут в сердца враг царевых. Престол твой, Боже, в век века; жезл правости жезл царствія твоего. Возлюбил еси правду и возненавидел еси беззаконіе; сего ради помаза тя, Боже, Бог твой елеем радости паче причастник твоих. Смирна и

стакти и касіа от риз твоих, от тяжестей слоновых, из нихже возвеселиша тя. Дщери царей в чести твоей; предста царица одесную тебе, в ризах позлащенных одеяна преиспещрена. Слыши, дщи, и виждь, и приклони ухо твое, и забуди люди твоя и дом отца твоего; и возжелает царь доброты твоея, зане той есть Господь твой, и поклонишия ему, и дщи тирова с дары; лицу твоему помолятся богатіи людстіи. Вся слава дщере царицы внутрь; рясны златыми одеяна и преиспещрена. Приведутся царю девы вслед ея, искреннія ея приведутся тебе; приведутся в веселіи и радованіи, введутся в храм царев. Вместо отец твоих быша сынове твои; поставиши я князи по всей земли. Помяну имя твое во всяком роде и роде; сего ради людіе исповедятя тебе в век и во век века.

Псалом 45.

Бог нам прибежище и сила, помощник в скорбех обретших ны зело. Сего ради не убоимся, внемда смущается земля, и прелагаются горы в сердца морская. Возшумеша и смятошася воды их, смятошася горы крепостію его. Речная устремленія веселят град Божій; остил есть селеніе свое вышній. Бог посреде его, и не подвижится; поможет ему Бог утро заутра. Смятошася языцы, уклонишася царствія; даде глас свой вышній, подвижеся земля. Господь сил с нами, заступник наш Бог іаковль. Приидите и видите дела Божія, яже положи чудеса на земли; отемля брани до конец земли, лук сокрушит и сломит оружіе, и щиты сожжет огнем. Упразднитесь и разумеите, яко аз есмь Бог; вознесуся во языцех, вознесуся на земли. Господь сил с нами, заступник наш Бог іаковль.

Псалом 46.

Вси языцы восплещите руками, воскликните Богу гласом радованія; яко Господь вышній страшен, царь велій по всей земли; покори люди нам и языки под ноги наша; избра нам достоянія свое, доброту іаковлю, юже возлюби. Взыде Бог в воскликновеніи, Господь во гласе трубне. Пойте Богу нашему, пойте; пойте царице нашему, пойте. яко царь всея земли Бог, пойте разумно. Воцарися Бог над языки; Бог седит на престоле святем своем. Князи людстіи собращася с Богом авраамлим; яко Божіи державніи земли зело вознесошася.

Псалом 47.

Велій Господь и хвален зело во граде Бога нашего, в горе святей его, благокоренным радованіем всея земли; горы Сіонскія, ребра северова, град царя великаго. Бог в тяжестех его знаемь есть, егда заступае и. Яко се, царіе земстіи собращася, снідошася вкупе; тіи видевшие тако, удивишася, смятошася, подвигошася; трепет пріят я тамо, болезни яко раждающія. Духом бурным сокрушиши корабли фарсійскія. Якоже слышахом, тако и видехом во граде Господа сил, во граде Бога нашего; Бог основа и в век. Пріяхом, Боже, милость твою посреде людій твоих. По

имени твоему, Боже, тако и хвала твоя на концах земли; правды исполнь десница твоя. Да возвеселится гора Сионская, и да возрадуются дочери иудейскія, судеб ради твоих, Господи. Обыдите Сион и обымите его, поведите в столпах его; положите сердца ваша в силу его, и разделите дома его, яко да повесте в роде инем. Яко той есть Бог наш во век и в век века; той упасет нас во веки.

Псалом 48.

Услышите сія вси языцы, внушите, вси живуціи по вселенней, земнородніи же и сынове человечестіи, вкупе богат и убог. Уста моя возглаголют премудрость, и поученіе сердца моего разум. Приклоню в притчу ухо мое, отверзу во псалтири гананіе мое. Вскую боюся в день лют? беззаконіе пяты моея обыдет мя. Надеющіися на силу свою и о множестве богатства своего хвалящіяся; брат не избавит, избавит ли человек? не даст Богу измены за ся, и цену избавленія души своея; и утрудися в век, и жив будет до конца, не узрит пагубы. Егда увидит премудрыя умирающыя, вкупе безумен и несмыслен погибнут, и оставят чуждим богатство свое. И гроби их жилища их во век, селенія их в род и род, нарекоша имена своя на землях. И человек в чести сый не разуме, приложися скотом несмысленным и уподобися им. Сей путь их соблазн им, и по сих во устех своих благоволят. Яко овцы во аде положени суть, смерть упасет я; и обладают ими правіи завтра, и помощь их обетшает во аде; от славы своея изриновени быша. Обаче Бог избавит душу мою из руки адовы, егда приємлет мя. Не убойся, егда разбогатеет человек, или егда умножится слава дому его; яко внемгда умрети ему, не возмет вся, ниже снидет с ним слава его. Яко душа его в животе его благословится, исповестся тебе, егда благосотвориши ему. Внидет даже до рода отец своих, даже до века не узрит света. И человек в чести сый не разуме, приложися скотом несмысленным и уподобися им.

Псалом 49.

Бог богов Господь ***гла, и призва землю от восток солнца до запад. От Сиона благолепіе красоты его; Бог яве приїдет, Бог наш, и не премолчит; огонь пред ним возгорится, и окрест его буря зелна. Призовет небо свыше, и землю, разсудити люди своя. Соберите ему преподобныя его, завещающыя завет его о жертвах. И возвестят небеса правду его; яко Бог судія есть. Услышите, людіе мои, и возглю вам, Израилю, и засвидетелствую тебе; Бог, Бог твой есмь аз. Не о жертвах твоих обличу тя, всесожженія же твоя предо мною суть выну; не прииму от дому твоего телцев, ниже от стад твоих козлов. Яко мои суть вси зверіе дубравніи, скоти в горах и волове; познах вся птицы небесныя, и красота селная со мною есть. Аще взалчу, не реку тебе; моя бо есть вселенная и исполнение ея. Еда ям мяса юнча? или кровь козлов пію? Пожри Богови жертву хвалы и воздаждь вышнему молитвы твоя; и призови мя в день скорби твоя, и изму тя, и прославиши мя. Грешнику же рече Бог; вскую ты поведаети оправданія моя и восприемлеши завет мой усты твоими? Ты

же возненавидел еси наказание и отвергнул еси словеса моя вспять. Аще видел еси татя, текл еси с ним, и с прелюбодеем участие твое полагал еси; уста твоя умножиша злобу, и язык твой сплеташе льщения; сидя на брата твоего клеветал еси и на сына матере твоея полагал еси соблазн. Сия сотворил еси, и умолчах, вознепщевал еси беззаконие, яко буду тебе подобен; обличу тя и представлю пред лицом твоим грехи твоя. Разумейте убо сия, забывающии Бога, да не когда похитит, и не будет избавляй. Жертва хвалы прославит мя, и тамо путь, имже явлю ему спасение мое.

Псалом 50.

Помилуй мя, Боже, по велицей милости твоей, и по множеству щедрот твоих очисти беззаконие мое. Наипаче омой мя от беззакония моего и от греха моего очисти мя; яко беззаконие мое аз знаю, и грех мой предо мною есть выну. Тебе единому согреших и лукавое пред тобою сотворих; яко да оправдишися во словесех твоих и победиши, внегда судити ти. Се бо, в беззаконіих зачат есмь, и во гресех роди мя мати моя. Се бо, истину возлюбил еси, безвестная и тайная премудрости твоея явил ми еси. Окропиши мя иссопом, и очищуся; омыеши мя, и паче снега убелюся. Слуху моему даси радость и веселіе; возрадуются кости смиренныя. Отврати лице твое от грех моих и вся беззаконія моя очисти. Сердце чисто созижди во мне, Боже, и дух прав обнови во утробе моей. Не отвержи мене от лица твоего и дха твоего святаго не отыми от мене. Воздаждь ми радость спасения твоего и дхом влчним утверди мя. Научу беззаконныя путем твоим, и нечестивіи к тебе обратятся. Избави мя от кровей, Боже, Боже спасения моего; возрадуется язык мой правде твоей. Господи, устне мои отверзеши, и уста моя возвестят хвалу твою. Яко аще бы восхотел еси жертвы, дал бых убо; всесожжения не благоволиши. Жертва Богу дух сокрушен; сердце сокрушенно и смиренно Бог не уничижит. Ублажи, Господи, благоволением твоим Сиона, и да созиждутся стены Иерусалимскія; тогда благоволиши жертву правды, возношение и всесожегаемая; тогда возложат на олтарь твой телцы.

Псалом 51.

Что хвалишися во злобе, сильне? беззаконіе весь день. неправду умысли язык твой; яко бритву изошрену сотворил еси лесть. Возлюбил еси злобу паче благостыни, неправду неже глаголати правду; возлюбил еси вся глаголы потопныя, язык льстив. Сего ради Бог разрушит тя до конца; восторгнет тя, и преселит тя от селения твоего и корень твой от земли живых. Узрят праведнии и убоятся, и о нем возсмеются и рекут; се, человек, иже не положи Бога помощника себе, но упова на множество богатства своего, и возможно суетою своею. Аз же яко маслина плодovита в дому Божіи; уповах на милость Божію во век и в век века. Исповемся тебе в век, яко сотворил еси; и терплю имя твое, яко благо пред преподобными твоими.

Псалом 52.

Рече безумен в сердцы своем; несть Бог. Растлеша и омерзишася в беззаконіих, несть творяй благое. Бог с небесе приниче на сыны человеческія, видети, аще есть разумевай или взыскай Бога. Все уклонишася, вкупе непотребни быша; несть творяй благое, несть до единого. Ни ли уразумеют все делающіи беззаконіе, снѣдающіи люди моя в снѣдь хлеба? Господа не призваша. Тамо устрашишася страха, идеже не бе страх; яко Бог разсыпа кости човекоугодников; постыдешася, яко Бог уничижи их. Кто даст от Сіона спасеніе Израилево? вегда возвратит Бог плененіе людій своих, возрадуется іаков и возвеселится Израиль.

Псалом 53.

Боже, во имя твое спаси мя и в силе твоей суди ми. Боже, услыши молитву мою, внуши глаголы уст моих; яко чужді восташа на мя, и крепцыи взыскаша душу мою, и не предложиша Бога пред собою. Се бо, Бог помогает ми, и Господь заступник души моей; отвратит злая врагом моим; истиною твоею потреби их. Волею пожру тебе, исповемся имени твоему, Господи, яко благо; яко от всякія печали избавил мя еси, и на враги моя возре око мое.

Псалом 54.

Внуши, Боже, молитву мою и не презри моленія моего; вонми ми и услыши мя; возскорбех печалію моею, и смятохся от гласа вражія и от стуженія грешника; яко уклониша на мя беззаконіе и во гнѣве враждоваху ми. Сердце мое смятется во мне, и боязнь смерти нападе на мя; страх и трепет пріиде на мя, и покры мя тма. И рех; кто даст ми криле яко голубине? и полещу, и почію. Се, удалихся бегая и водворихся в пустыни. Чаях Бога спасающаго мя от малодушія и от бури. Потопи, Господи, и раздели языки их; яко видех беззаконіе и пререканіе во граде. Днем и нощію обыдет и по стенам его; беззаконіе и труд посреде его, и неправда; и не оскуде от стогн его лихва и лѣсть. Яко аще бы враг поносил ми, претерпел бых убо; и аще бы ненавидяй мя на мя велеречевал, укрылбыхся от него. Ты же, человеце равнодушне, владыко мой и знаемый мой, иже купно наслаждался еси со мною брашен; в дому Божіи ходихом единомышленіем. Да пріидет же смерть на ня, и да снідут во ад живи; яко лукавство в жилищих их, посреде их. Аз к Богу возвах, и Господь услыша мя. Вечер и заутра и полудне повем и возвещу, и услышит глас мой. Избавит миром душу мою от приближающихся мне; яко во мнозе бяху со мною. Услышит Бог, и смирит я сый прежде век; несть бо им измененія, яко не убояшася Бога. Простре руку свою на воздаяніе; оскверниша завет его. Разделишася от гнѣва лица его, и приближишася сердца их; умякнуша словеса их паче елеа, и та суть стрелы. Возверзи на Господа печаль твою, и той тя препитает; не даст в век молвы праведнику. Ты же, Боже, низведеши их

в студенец истления; мужие кровей и лъсти не преполовят дній своих. Аз же, Господи, уповаю на тя.

Псалом 55.

Помилуй мя, Боже, яко попра мя человек; весь день боря стужи ми. Попраша мя врази мои весь день; яко мнози борющіи мя с высоты. В день не убоюся, аз же уповаю на тя. О Бозе похваляю словеса моя; на Бога уповах, не убоюся; что сотворит мне плоть? Весь день словес моих гнушахуся; на мя вся помышления их на зло. Вселятся и скрывают, тиі пятаю мою сохраняют, якоже потерпеша душу мою. Ни о чесомже отринеси я, гневом люди низведеси. Боже, живот мой возвестих тебе; положил еси слезы моя пред тобою, яко и во обетованіи твоём. Да возвратятся врази мои вспять, в онъже аще день призову тя; се, познах, яко Бог мой еси ты. О Бозе похваляю глагол, о Господе похваляю слово. На Бога уповах, не убоюся; что сотворит мне человек? Во мне, Боже, молитвы, яже воздам хвалы твоя; яко избавил еси душу мою от смерти, очи мои от слез и нозе мои от поползновения; благоугожду пред Господем во свете живых.

Псалом 56.

Помилуй мя, Боже, помилуй мя; яко на тя упова душа моя, и на сень крилу твоею надеюся, дондеже преидет беззаконіе. Воззову к Богу вышнему, Богу благодѣявшему мне. Посла с небесе и спасе мя, даде в поношеніе попирающыя мя; посла Бог милость свою и истину свою, и избави душу мою от среды скимнов. Поспах смущен; сынове человечестіи, зубы их оружія и стрелы, и язык их мечь остр. Вознесися на небеса, Боже, и по всей земли слава твоя. Сеть уготоваша ногам моим, и слякоша душу мою; ископаша пред лицем моим яму, и впадоша в ню. Готово сердце мое, Боже, готово сердце мое; воспую и пою во славе моей. Востани, слава моя, востани, псалтирю и гусли; встану рано. Исповемся тебе в людех, Господи, воспую тебе во языцех; яко возвеличися до небес милость твоя и даже до облак истина твоя. Вознесися на небеса, Боже, и по всей земли слава твоя.

Псалом 57.

Аще воистинну убо правду глаголете, правая судите, сынове человечестіи. Ибо в сердцах беззаконіе делаете на земли, неправду руки ваша сплетают. Очуждишася грешницы от ложесн, заблудиша от чрева, глаголаша лжу. Ярость их по подобію зміину, яко аспіда глуха и затыкающаго уши свои, иже не услышит гласа обавающих, обаваемъ обаваются от премудра. Бог сокрушит зубы их во устех их; членовныя львов сокрушил есть Господь. Уничижатся яко вода мимотекущая; напряжет лук свой, дондеже изнемогут. Яко воск растаяв отимутся; паде огонь на них, и не видеша солнца. Прежде еже разумети тернія вашего рамна, яко живы, яко во гнѣве пожрет я. Возвеселится праведник, егда увидит отмщеніе; руце свои умыет в крови грешника. И речет человек;

аще убо есть плод праведнику, убо есть Бог судя им на земли.

Псалом 58.

Изми мя от враг моих, Боже, и от востающих на мя избави мя; избави мя от делающих беззаконіе, и от муж кровей спаси мя. Яко се, уловиша душу мою, нападоша на мя крепцыи; ниже беззаконіе мое, ниже грех мой, Господи; без беззаконія текох и исправих; востани в сретеніе мое и виждь. И ты, Господи Боже сил, Боже Израилев, вонми посетити вся языки; да не ущедриши вся делающыя беззаконіе. Возвратятся на вечер, и взалчут яко пес, и обыдут град. Се, ти отвещают усты своими, и мечь во устнах их; яко кто слыша? И ты, Господи, посмеешься им, уничижиши вся языки. Державу мою к тебе сохраняю; яко ты, Боже, заступник мой еси. Бог мой, милость его предварит мя; Бог мой, явит мне на вразех моих. Не убій их, да не когда забудут закон твой; расточи я силою твоею и низведи я, защитниче мой, Господи, Грех уст их, слово устен их; и яти да будут в гордыни своей, и от клятвы и лжи возвестятся в кончине, во гневе кончины, и не будут; и уведят, яко Бог владычествует іаковом и концы земли. Возвратятся на вечер, и взалчут яко пес, и обыдут град; ти разыдутся ясти; аще ли же не насытятся, и поропщут. Аз же воспою силу твою и возрадуюся завтра о милости твоей; яко был еси заступник мой и прибежище мое в день скорби моя. Помощник мой еси, тебе пою; яко Бог заступник мой еси, Боже мой, милость моя.

Псалом 59.

Боже, отринул ны еси и низложил еси нас, разгневался еси и ущедрил еси нас. Стрясл еси землю и смутил еси ю; исцели сокрушеніе ея, яко подвижеся. Показал еси людям твоим жестокая; напоил еси нас вином умиленія. Дал еси боящымся тебе знаменіе, еже убежати от лица лука. Яко да избавятся возлюбленнии твои, спаси десницею твоею и услыши мя. Бог возгла во святем своем; возрадуюся, и разделю сікиму, и юдоль жилищ размерю. Мой есть галаад, и мой есть манассій, ефрем крепость главы моя, іуда царь мой. Моав коноб упованія моего; на ідумею простру сапог мой; мне иноплеменницы покоришася. Кто введет мя во град огражденія? или кто наставит мя до ідумеи? Не ты ли, Боже, отринувый нас? и не изыдеши, Боже, в силах наших? Дажь нам помощь от скорби; и суетно спасеніе человеческо. О Боже сотворим силу; и той уничижит стужающыя нам.

Псалом 60.

Услыши, Боже, моленіе мое, вонми молитве моей; от конец земли к тебе возвах, вегда уны сердце мое; на камень вознесл мя еси, наставил мя еси, яко был еси упованіе мое, столп крепости от лица вражія. Вселюся в селеніи твоем во веки, покрюся в крове крил твоих. Яко ты, Боже,

услышал еси молитвы моя, дал еси достояніе боящимся имене твоего. Дни на дни царевы приложиши, лета его до дне рода и рода. Пребудет в век пред Богом; милость и истину его кто възыщет? Тако воспою имени твоему во веки, воздати ми молитвы моя день от дне.

Псалом 61.

Не Богу ли повинется душа моя? от того бо спасеніе мое. Ибо той Бог мой и спас мой, заступник мой; не подвижуся наипаче. Доколе належите на человека? убиваете вси вы, яко стене преклонене и оплоту возриновену. Обаче цену мою совещаша отринуту, текоша в жажди; усты своими благословляху, и сердцем своим кленяху. Обаче Богови повинися, душе моя; яко от того терпеніе мое. Ибо той Бог мой и спас мой, заступник мой; не преселюся. О Бозе спасеніе мое и слава моя; Бог помощи моея, и упованіе мое на Бога. Уповайте на него, весь сонм людій; изліяйте пред ним сердца ваша, яко Бог помощник наш. Обаче суетни сынове человечестіи, лживи сынове человечестіи в мерилех еже неправдовати; тіи от суеты вкупе. Не уповайте на неправду, и на восхищеніе не желайте; богатство аще течет, не прилагайте сердца. Единою гла Бог, двоя сія слышах, зане держава Божія, и твоя, Господи, милость; яко ты воздаси комуждо по делом его.

Псалом 62.

Боже, Боже мой, к тебе утренюю; возжада тебе душа моя, коль множицею тебе плоть моя, в земли пусте и непроходне и безводне. Тако во святем явихся тебе, видети силу твою и славу твою. Яко лучши милость твоя паче живот; устне мои похвалите тя. Тако благословлю тя в животе моем и о имени твоём воздежу руке мои. Яко от тука и масти да исполнится душа моя, и устнама радости восхвалят тя уста моя. Аще поминах тя на постели моей, на утренних поучахся в тя; яко был еси помощник мой, и в крове крилу твоею возрадуюся. Прильпе душа моя по тебе; мене же пріят десница твоя. Тіи же всуе искаша душу мою; внидут в преисподняя земли; предадутся в руки оружія, части лисовом будут. Царь же возвеселится о Бозе; похвалится всяк кленыйся им, яко заградишася уста глаголющих неправедная.

Псалом 63.

Услыши, Боже, глас мой, внемда молитимися к тебе; от страха вражія изми душу мою. Покрый мя от сонма лукавнующих, от множества делающих неправду; иже изостриша яко мечь языки своя, на прягоша лук свой, вещь горьку, состреляти в тайных непорочна; внезапно состреляют его, и не убоятся. Утвердиша себе слово лукавое; поведаша скрыти сеть, реша; кто узрит их? Испыташа беззаконіе; исчезоша испытующіи испытанія; приступит человек, и сердце глубоко. И вознесется Бог; стрелы младенец быша язвы их, и изнемогоша на ня язвыцы их; смутишася вси видящіи их. И убоятся всяк человек; и

возвестиша дела Божія, и творенія его разумеша. Возвеселится праведник о Господе и уповае на него; и похвалятся вси праві сердцем.

Псалом 64.

Тебе подобает песнь, Боже, в Сіоне, и тебе воздастся молитва во Іерусалиме. Услыши молитву мою; к тебе всяка плоть приидет. Словеса беззаконник премогаша нас; и нечестія наша ты очисти. Блажен, егоже избрал еси и приял, вселится во дворех твоих. Исполнимся во благих дому твоего; свят храм твой. Дивен в правде, услыши ны, Боже, спасителю наш, упование всех концев земли и сущих в мори далече; уготворяй горы крепостію своею, препоясан силою; смущаяй глубину морскую, шуму волн его кто постоит? смятутся языцы, и убоятся живущіи в концах от знаменій твоих; исходы утра и вечера украсиши. Посетил еси землю и упоил еси ю, умножил еси обогатити ю; река Божія наполнися вод; уготовал еси пищу им, яко тако есть уготованіе. Бразды ея упой, умножи жита ея; в каплях ея возвеселится прозябаючи. Благословиши венец лета благости твоея, и поля твоя исполнятся тука; разботеют красная пустыни, и радостію холми препояшутся. Одеаяся овни овчі, и удолія умножат пшеницу; воззовут, ибо воспоют.

Псалом 65.

Воскликните Господеву вся земля, пойте же имени его, дадите славу хвале его. Рцыте Богу; коль страшна дела твоя? во множестве силы твоея солжут тебе врази твои. Вся земля да поклонится тебе и поет тебе, да поет же имени твоему, вышній. Приидите и видите дела Божія, коль страшен в советех паче сынов человеческих. Обращаяй море в сушу, в реце пройдут ногами; тамо возвеселимся о нем, владычествующем силою своею веком; очи его на языки призираете; преогорчевающіи да не возносятся в себе. Благословите, языцы, Бога нашего, и услышан сотворите глас хвалы его, положшаго душу мою в живот, и не даваго во смятеніе ног моих. Яко искусил ны еси, Боже, разжегл ны еси, якоже разжизается сребро. Ввел ны еси в сеть, положил еси скорби на хребте нашем. Возвел еси человеки на главы наша; проидохом сквозе огонь и воду, и извел еси ны в покой. Вниду в дом твой со всесожженіем, воздам тебе молитвы моя, яже изрекосте устне мои, и глаголаша уста моя в скорби моей. Всесожженія тучна вознесу тебе с кадилом, и овны, вознесу тебе воли с козлы. Приидите, услышите, и повем вам, вси боящіяся Бога, елика сотвори души моей. К нему усты моими воззвах, и вознесох под языком моим. Неправду аще узрех в сердцах моем, да не услышит мене Господь. Сего ради услыша мя Бог, внят гласу моленія моего. Благословен Бог, иже не отстави молитву мою и милость свою от мене.

Псалом 66.

Боже, ущедри ны и благослови ны, просвети лице твое на ны и помилуй ны; Познати на земли путь твой, во всех языцех спасеніе твое. Да

исповедятся тебе людіе, Боже, да исповедятся тебе людіе вси. Да возвеселятся и да возрадуются языцы; яко судиши людем правотою, и языки на земли наставиши. Да исповедятся тебе людіе, Боже, да исповедятся тебе людіе вси. Земля даде плод свой; благослови ны, Боже, Боже наш, благослови ны, Боже; и да убоятся его вси концы земли.

Псалом 67.

Да воскреснет Бог, и расточатся врази его, и да бежат от лица его ненавидящии его. Яко исчезает дым, да исчезнут; яко тает воск от лица огня, тако да погибнут грешницы от лица Божія; а праведницы да возвеселятся, да возрадуются пред Богом, да наслаждаются в веселіи. Воспойте Богу, пойте имени его; путесотворите возшедшему на запады, Господь имя ему; и радуйтеся пред ним. Да смятутся от лица его, оца сирых и судии вдовиц; Бог в месте святем своем. Бог вселяет единомысленныя в дом, изводя окованныя мужеством, такожде преогорчевающыя живущыя во гробех. Боже, внегда исходити тебе пред людьми твоими, внегда мимоходити тебе в пустыни, земля потрясется, ибо небеса кануша от лица Бога сінаина, от лица Бога Израилева. Дождь волен отлучиши, Боже, достоянію твоему, и изнеможе, ты же совершил еси е. Животная твоя живут на ней; уготовал еси благостию твоею нищему, Боже. Господь даст глагол благовествующим силою мною; царь сил возлюбленнаго, красотою дому разделитьи корысти. Аще поспите посреде предел, криле голубине посребрене, и междорамія ея в блещаніи злата; внегда разнствит небесный цари на ней, оснежатся в селмоне. Гора Божія, гора тучная, гора усыренная, гора тучная. Вскую непщуете, горы усыренные? гора, юже благоволи Бог жити в ней; ибо Господь вселится до конца. Колесница Божія тмами тем, тысяща гобзующих; Господь в них в сінаи во святем. Возшел еси на высоту, пленил еси плен; пріял еси даянія в человецех, ибо не покаряющыяся, еже вселитися. Господь Бог благословен, благословен Господь день дне; поспешит нам Бог спасеній наших. Бог наш Бог еже спасати; и Господня, Господня исходища смертная. Обаче Бог сокрушит главы врагов своих, верх влас преходящих в прегрешеніих своих. Рече Господь; от васана обрацу, обрацу во глубинах морских; яко да омочится нога твоя в крови, язык пес твоих от враг от него. Видена быша шествія твоя, Боже, шествія Бога моего царя, иже во святем. Предвариша князи близ поющих, посреде дев тимпанниц. В церквах благословите Бога, Господа от источник Израилевых. Тамо веніамін юнейшій во ужасе, князи іудовы владыки их, князи завулони, князи неффалімли. Заповеждь, Боже, силою твоею; укрепи, Боже, сіе, еже соделал еси в нас. От храма твоего во Іерусалим тебе принесут царіе дары. Запрети зверем тростным; сонм юнец в юницах людских, еже затворити искушенныя сребром; расточи языки хотящыя бранем. Придут молитвенницы от египта; ефіопія предварит руку свою к Богу. Царства земная, пойте Богу, воспойте Господеви, возшедшему на нбо небесе на востоки; се, даст гласу своему глас силы. Дадите славу Богови; на Израили велелепота его, и сила его

на облацех. Дивен Бог во святых своих; Бог Израилев, той даст силу и державу людем своим. Благословен Бог.

Псалом 68.

Спаси мя, Боже, яко внидоша воды до души моя. Углебох в тимені глубины, и несть постоянія; придох во глубины морскія, и буря потопа мя. Утрудихся зовый, измолче гортань мой; исчезосте очи мои, от еже уповати ми на Бога моего. Умножишася паче влас главы моя ненавидящїи мя туне; укрепишася врази мои, изгонящїи мя неправедно; яже не восхищах, тогда воздаях. Боже, ты уведел еси безуміе мое, и прегрешенія моя от тебе не утаишася. Да не постыдятся о мне терпящїи тебе, Господи, Господи сил; ниже да посрамятся о мне ищущїи тебе, Боже Израилев. Яко тебе ради претерпех поношеніе, покры срамота лице мое. Чуждъ бых братїи моей и странен сыновом матери моея; яко ревность дому твоего снеде мя, и поношенія поносящих ти нападоша на мя. И покрых постом душу мою, и бысть в поношеніе мне; и положих одеяніе мое в ретище, и бых им в притчу. О мне глумляхуся сидящїи во вратах, и о мне пояху піющїи віно. Аз же молитвою моею к тебе, Боже; время благоволенія, Боже; во множестве милости твоея услыши мя, во истине спасенія твоего. Спаси мя от брениа, да не углубну; да избавлюся от ненавидящих мя и от глубоких вод. Да не потопит мене буря водная, ниже да пожрет мене глубина, ниже сведет о мне ровенник уст своих. Услыши мя, Господи, яко блага милость твоя; по множеству щедрот твоих призри на мя. Не отврати лица твоего от отрока твоего, яко скорблю; скоро услыши мя. Вонми души моей и избави ю; враг моих ради избави мя. Ты бо веси поношеніе мое, и студ мой, и срамоту мою; пред тобою вси оскорбляющїи мя. Поношеніе чаяше душа моя и страсть; и ждах соскорбящаго, и не бе, и утешающих, и не обретох. И даша в снедь мою желчь, и в жажду мою напоиша мя оцта. Да будет трапеза их пред ними в сеть и в воздаяніе и в соблазн. Да помрачатся очи их, еже не видети, и хребет их выну сляцы. Пролїй на ня гнев твой, и ярость гнева твоего да постигнет их. Да будет двор их пуст, и в жилищих их да не будет живый. Зане егоже ты поразил еси, тіи погнаша, и к болезни язв моих приложиша. Приложи беззаконіе к беззаконію их, и да не внидут в правду твою. Да потребятся от книги живых, и с праведными да не напишутся. Нищ и боляй есмь аз; спасеніе твое, Боже, да приимет мя. Восхваляю имя Бога моего с песнію, возвеличу его во хваленіи; и угодно будет Богу паче телца юна, роги износяща и пазнокти. Да узрят нищїи и возвеселятся; възшците Бога, и жива будет душа ваша. Яко услыша убогія Господь, и окованныя своя не уничижи. Да восхвалят его небеса и земля, море и вся живущая в нем. Яко Бог спасет Сїона, и созиждутся гради іудейстїи, и вселятся тамо и наследят и; и семья рабов твоих удержит и, и любящїи имя твое вселятся в нем.

Псалом 69.

Боже, в помощь мою вонми; Господи, помощи ми потщися. Да

постыдятся и посрамятся ищущи душу мою. да возвратятся вспять и постыдятся хотящи ми злая; да возвратятся абіе стыдящесе глаголющи ми; благоже, благоже. Да возрадуются и возвеселятся о тебе вси ищущи тебе, Боже; и да глаголют выну, да возвеличится Господь, любящи спасеніе твое. Аз же нищ есмь и убог, Боже, помози ми; помощник мой и избавитель мой еси ты, Господи, не закосни.

Псалом 70.

На тя, Господи, уповах, да не постыжуся в век. Правдою твоею избави мя и изми мя; приклони ко мне ухо твое и спаси мя. Буди ми в Бога защитителя и в место крепко спасти мя; яко утверждение мое и прибежище мое еси ты. Боже мой, избави мя из руки грешнаго, из руки законопреступнаго и обидящаго; Яко ты еси терпение мое, Господи, Господи, упование мое от юности моея. В тебе утвердихся от утробы, от чрева матере моея ты еси мой покровитель; о тебе пеніе мое выну. Яко чудо бых многим; и ты помощник мой крепок. Да исполнятся уста моя хваления, яко да воспою славу твою, весь день великолепие твое. Не отвержи мене во время старости; внигда оскудевати крепости моея, не остави мене. Яко реша врази мои мне, и стрегущи душу мою совещаша вкупе, глаголюще; Бог оставил есть его, пожените и имите его, яко несть избавляяй. Боже мой, не удалися от мене; Боже мой, в помощь мою вонми. Да постыдятся и исчезнут оклеветающи душу мою, да облекутся в студ и срам ищущи злая мне. Аз же всегда возуповаю на тя, и приложу на всяку похвалу твою. Уста моя возвестят правду твою, весь день спасение твое, яко не познах книжная. Вниду в силе Господни; Господи, помяну правду тебе единого. Боже мой, имже научил мя еси от юности моея, и донне возвещу чудеса твоя. И даже до старости и престарения, Боже мой, не остави мене, дондеже возвещу мышцу твою роду всему грядущему, силу твою и правду твою, Боже, даже до вышних, яже сотворил ми еси величия; Боже, кто подобен тебе? Елики явил ми еси скорби многи и злы? и обращайся оживотворил мя еси и от бездн земли возвел мя еси. Умножил еси на мне величество твое, и обращайся утешил мя еси, и от бездн земли паки возвел мя еси. Ибо аз исповемся тебе в людех, Господи, в сосудех псаломских истину твою, Боже; воспою тебе в гуслах, стый Израилев. Возрадуются устне мои, егда воспою тебе, и душа моя, юже еси избавил; еще же и язык мой весь день поучится правде твоей, егда постыдятся и посрамятся ищущий злая мне.

Псалом 71.

Боже, суд твой цареви даждь, и правду твою сыну цареву; судити людем твоим в правде и нищым твоим в суде. Да воспримут горы мир людем и холми правду. Судит нищым людским, и спасет сыны убогих, и смирит клеветника. И пребудет с солнцем, и прежде луны рода родов. Снидет яко дождь на руно, и яко капля каплющая на землю. Возсияет во днех его правда и множество мира, дондеже отимется луна. И обладает от моря до моря, и от рек до конец вселенныя. Пред ним припадут ефіопляне, и

врази его персть полижут. Царіе фарсїйстіи и острови дары принесут, царіе аравстіи и сава дары приведут; и поклонятся ему вси царіе земстіи, вси языцы поработают ему. Яко избави нища от сильна, и убога, емуже не бе помощника. Пощадит нища и убога, и души убогих спасет; от лихвы и от неправды избавит души их, и честно имя его пред ними. И жив будет, и дастся ему от злата аравїйска; и помолятся о нем выну, весь день благословят его. Будет утверждєніе на земли на версех гор; превознесетсѧ паче лївана плод его, и процветут от града яко трава земная. Будет имя его благословєно во веки, прежде солнца пребывает имя его; и благословятсѧ в нем вся колєна земная, вси языцы ублажат его. Благословєн Господь Бог Израилєв, творѧй чудеса єдин, и благословєно имя славы его во век и в век века; и исполнитсѧ славы его вся земля; буди, буди.

Псалом 72.

Коль благ Бог Израилєв правым сердцем. Мои же в малє не подвижастєся нозє; в малє не проліяшасѧ стопы моя; яко возревновах на беззаконныѧ, мир грєшников зря; яко несть восклонєніѧ в смєрти их и утверждєніѧ в ранє их; в трудєх чєловєческих не суть, и с чєловеки не прїимут ран. Сєго ради удєржа я гордыня их до концѧ; одєяшасѧ неправдою и нечєстієм своим. Изыдет яко из тука неправда их; прєидоша в любовь сердца. Помыслиша и глаголаша в лукавствє, неправду в высоту глаголаша; положиша на небєси уста своя, и язык их прєйдє по земли. Сєго ради обратятсѧ людїє мои сємо, и днїє исполнєни обрѧщутсѧ в них. И рєша; како увєдє Бог? и ащє єсть разум в вышнєм? Се, сїи грєшницы и гобзующїи в век удєржашѧ богатство. И рєх; еда всує оправдих сердце мое и умых в неповинных руцє мои, и бых язвен весь дєнь, и обличєніє мое на утрєних? Ащє глаголах, повєм тако; сє, роду сынов твоих, емуже обєщасѧ; и непщєвах разумєти; сїє труд єсть прєдо мною, дондєжє внїду во свѧтило Божїє и разумєю в послєдныѧ их. Обачє за льщєніѧ их положил єси им злѧя, низложил єси я, внєгда разгордєшасѧ. Какò быша в запустєніє? внєзапу изчєзоша, погїбоша за беззаконїє своє. Яко сонїє востающѧго, Господи, во градє твоєм образ их уничижиши. Яко разжжєся сердце мое, и утробы моя изменишасѧ; и аз уничижен, и не разумєх, скотєн бых у тєбє. И аз выну с тобою; удєржал єси руку десную мою, и советом твоєм наставил мя єси, и со славою прїѧл мя єси. Чтò бо ми єсть на небєси? и от тєбє чтò восхотєх на земли? Изчєзє сердце мое и плоть моя, Боже сердца моего, и часть моя, Боже, во век. Яко сє, удаляющїи сєбє от тєбє погїбнут; потрєбил єси всякаго любодєющѧго от тєбє. Мне же прилєплѧтсѧ Богови благо єсть, полагати на Господѧ упованїє мое, возвєстити ми вся хвалы твоя, во вратєх дщєрє Сїони.

Псалом 73.

Вскую, Боже, отринул єси до концѧ? разгнєвасѧ ярость твоя на овцы пажити твоя? Помѧни сонм твой, єгожє стѧжал єси испєрва, избавил

еси жезлом достоянія твоего, гора Сіон сія, в нейже вселился еси. Воздвигни руце твои на гордыни их в конец, елика лукавнова враг во святем твоём. И восхвалишася ненавидящии тя посреде праздника твоего; положиша знаменія своя знаменія, и не познаша. яко во исходе превыше; яко в дубраве древяне секирами разокоша двери его вкупе, сечивом и оскордом разрушиша и. Возжгоша огнем святило твое; на земли оскверниша жилище имене твоего. Реша в сердцы своем южики их вкупе; приидите, и отставим вся праздники Божія от земли. Знаменія их не видехом; несть ктому пррока, и нас не познает ктому. Доколе, Боже, поносит враг? раздражит противный имя твое до конца? Вскую отвращаеши руку твою и десницу твою от среды недра твоего в конец? Бог же, царь наш, прежде века содела спасеніе посреде земли. Ты утвердил еси силою твоею море; ты стерл еси главы зміев в воде; ты сокрушил еси главу зміеву, дал еси того брашно людем ефіопским. Ты расторгл еси источники и потоки; ты изсушил еси реки ифамскія. Твой есть день, и твоя есть ночь; ты совершил еси зарю и солнце. Ты сотворил еси вся пределы земли; жатву и весну ты создал еси я. Помяни сія; враг поноси Господеви, и людіе безумнии раздражиша имя твое. Не предаждь зверем душу исповедающуюся тебе; душ убогих твоих не забуди до конца. Призри на завет твой; яко исполнишася помраченніи земли домов беззаконій. Да не возвратится смиренный посрамлен; нищ и убог восхвалита имя твое. Востани, Боже, суди прю твою; помяни поношеніе твое, еже от безумнаго весь день. Не забуди гласа молитвенник твоих; гордыня ненавидящих тя взыде выну.

Псалом 74.

Исповемыся тебе, Боже, исповемыся тебе и призовем имя твое; повем вся чудеса твоя. Егда прииму время, аз правоты возсужду. Растаяся земля и вси живущии на ней, аз утвердих столпы ея. Рех беззаконующым, не беззаконуйте; и согрешающим, не возносите рога. Не воздвизайте на высоту рога вашего и не глаголите на Бога неправду; яко ниже от исход, ниже и запад, ниже от пустых гор. Яко Бог судія есть; сего смиряет, и сего возносит. Яко чаша в руце Господни, вина неразтворена исполнь растворенія, и уклони от сея в сію; обаче дрождіе его не истощися, испіют вси грешніи земли. Аз же возрадуюся в век, воспую Богу іаковлю; и вся роги грешных сломлю, и вознесетя рог праведнаго.

Псалом 75.

Ведом во іудеи Бог; во Израили веліе имя его. И бысть в мире место его, и жилище его в Сіоне. Тамо сокруши крепости луков, оружіе и мечь и брань. Просвещаеши ты дивно от гор вечных. Смятошася вси неразумнии сердцем; уснуша сном своим, и ничтоже обретоша вси мужіе богатства в руках своих. От запрещенія твоего, Боже іаковль, воздремаша вседшіи на кони. Ты страшен еси, и кто противостанет тебе? оттоле гнев твой. С небесе слышан сотворил еси суд; земля убояся и умолча, внегода востати

на суд Богу, спасти вся кроткія земли. Яко помышленіе человеческое исповестся тебе, и останок помышленія празднует ти. Помолитесь и воздадите Господеви Богу нашему; вси, иже окрест его, принесут дары страшному и отемлющему духи князей, страшному паче царей земных.

Псалом 76.

Гласом моим ко Господу воззвах, гласом моим к Богу, и внят ми. В день скорби моя Бога взысках рукама моима, нощю пред ним, и не прельщен бых; отвержеся утешитися душа моя. Помянух Бога и возвеселихся, размышлях, и малодушствоваше дух мой. Предваристе стражбы очи мои; смятохся и не глаголах. Помыслих дни первыя, и лета вечная помянух, и поучахся; нощю сердцем моим размышлях и тужаше дух мой; еда во веки отринет Господь и не приложит благоволити паки? или до конца милость свою отсечет, сконча глагол от рода в род? еда забудет ущедрити Бог? или удержит во гневѣ своем щедроты своя? И рех; ныне начах, сія измена десницы вышняго. Помянух дела Господня; яко помяну от начала чудеса твоя, и поучуся во всех делех твоих, и в начинаніих твоих размышляти буду. Боже, во святем путь твой; кто Бог велій, яко Бог наш? Ты еси Бог творяй чудеса; сказал еси в людех силу твою, избавил еси мышцею твоею люди твоя, сыны іаковли и іосифовы. Видеша тя воды, Боже, видеша тя воды и убояшася; смятошася бездны. Множество шума вод; глас даша облацы, ибо стрелы твоя преходят. Глас грома твоего в колеси, осветиша молнія твоя вселенную; подвижеся и трепетна бысть земля. В мори путіе твои, и стези твоя в водах многих, и следы твои не познаются. Наставил еси яко овцы люди твоя рукою моисевою и ааронею.

Псалом 77.

Внемлите, людіе мои, закону моему, приклоните ухо ваше во глаголы уст моих. Отверзу в притчах уста моя, провещаю гананія исперва. Елика слышахом и познахом я, и отцы наши поведаша нам; не утаишася от чад их в род ин, возвещающе хвалы Господни, и силы его и чудеса его, яже сотвори. И воздвиже свиденіе во іакове, и закон положи во Израили, елика заповеда отцем нашим сказати я сыновом своим, яко да познает род ин, сынове родящіися, и востанут и поведят я сыновом своим; да положат на Бога упованіе свое, и не забудут дел Божіих, и заповеди его взыщут; да не будут якоже отцы их, род строптив и преогорчевай, род иже не исправи сердца своего и не увери с Богом духа своего. Сынове ефремли наляцающе и стреляюще луки возвратишася в день брани; не сохраниша завета Божія, и в законе его не восхотеша ходити. И забыша благодеянія его и чудеса его, яже показа имъ пред отцы их, яже сотвори чудеса в земли египетстей, на поли танеосе; разверзе море и проведе их; представи воды яко мех, и настави я облаком во дни и всю ночь просвещеніем огня. Разверзе камень в пустыни и напои я яко в бездне мнозе; и изведе воду из камене и низведе яко реки воды. И приложиша еще согрешати ему, преогорчиша вышняго в безводней; и искусиша Бога

в сердцах своих, воспросити брашна душам своим. И клеветаша на Бога и реша; еда возможет Бог уготовати трапезу в пустыни? Понеже порази камень, и потекоша воды, и потоцы наводнишася; еда и хлеб может дати? или уготовати трапезу людем своим? Сего ради слыша Господь и презре, и огонь возгореся во іакове, и гнев взыде на Израиля; яко не вероваша Богови, ниже уповаша на спасеніе его. И заоведа облаком свыше, и двери небесе отверзе; и одожди им манну ясти, и хлеб небесный даде им. Хлеб ангельскій яде человек; брашно посла им до сытости. Воздвиже юг с небесе, и наведе силою своею лѣва; и одожди на ня яко прах плоти, и яко песок морскій птицы пернаты. И нападоша посреде стана их, окрест жилищ их. И ядоша и насытишася зело, и желаніе их пренесе им. Не лишишася от желанія своего; еще брашну суцу во устех их, и гнев Божій взыде на ня, и уби множайшая их, и избранным Израилевым запят. Во всех сих согресиша еще и не вероваша чудесем его; и исчезоша в суете дніе их, и лета их со тцаніем. Егда убиваше я, тогда взыскаху его и обращахуся и утреневаху к Богу; и помянуша, яко Бог помощник им есть, и Бог вышній избавитель им есть; и возлюбиша его усты своими, и языком своим солгаша ему; сердце же их не бе право с ним, ниже уверишася в завете его. Той же есть щедр, и очистит грехи их, и не растлит; и умножит отвратити ярость свою, и не разжжет всего гнева своего. И помяну, яко плоть суть, дух ходяй и не обращайся; Колькраты преогорчиша его в пустыни, прогневаша его в земли безводней? и обратишася, и искусиша Бога, и святаго Израилева раздражиша; и не помянуша руки его в день, в онъже избави я из руки оскорбляющаго; якоже положи во египте знаменія своя, и чудеса своя на поли танаесе; и преложи в кровь реки их и источники их, яко да не піют. Посла на ня песія мухи, и поядоша я, и жабы, и растли я; и даде рже плоды их, и труды их пругом. Уби градом винограды их и черничіе их сланою; и предаде граду скоты их, и именіе их огню. Посла на ня гнев ярости своя, ярость и гнев и скорбь, посланіе аггелы лютыми. Путесотвори стезю гневу своему, и не пощаде от смерти душ их, и скоты их в смерти заключи; и порази всякое первородное в земли египетстей, начаток всякаго труда их в селеніих хамовых. И воздвиже яко овцы люди своя, и возведе я яко стадо в пустыни; и настави я на упованіе, и не убояшася; и враги их покры море. И введе я в гору святины своя, гору сію, юже стяжа десница его. И изгна от лица их языки, и по жребію даде им землю ужем жребодаянія, и всели в селеніих их колена Израилева. И искусиша и преогорчиша Бога вышняго, и свиденій его не сохраниша; и отвратишася и отвергошася, якоже и отцы их; превратишася в лук развращен; и прогневаша его в холмех своих, и во истуканных своих раздражиша его. Слыша Бог и презре, и уничижи зело Израиля; и отрину скинію силомскую, селеніе свое, идеже вселися в человецех; и предаде в плен крепость их, и доброту их в руки врагов; и затвори во оружїи люди своя и достояніе свое презре. Юношы их пояде огонь, и девы их не осетованы быша; священницы их мечем падоша, и вдовицы их не оплаканы будут. И воста яко спя Господь, яко силен и шумен от вина; и порази враги своя вспять, поношеніе вечное даде им; и отрину селеніе

іосифово, и колено ефремово не избра; и избра колено іудово, гору Сіюню, юже возлюби; и созда яко единорога святилище свое; на земли основа и в век. И избра Давида раба своего, и воспріят его от стад овчих; от доилиц поят его, пасти іакова раба своего, и Израиля достояніе свое. И упасе я в незлобіи сердца своего, и в разумех руку своею наставил я есть.

Псалом 78.

Боже, придоша языцы в достояніе твое, оскверниша храм святыи твой, положиша Іерусалим яко овощное хранилище; положиша трупія раб твоих брашно птицам небесным, плоти преподобных твоих зверем земным; проліяша кровь их яко воду окрест Іерусалима, и не бе погребаяй. Быхом поношеніе соседом нашим, подражненіе и поруганіе сущым окрест нас. Доколе, Господи, прогневаешися до конца? разжжется яко огонь рвеніе твое? Пролій гнев твой на языки незнающыя тебе, и на царствія, яже имене твоего не призваша; яко поядоша іакова, и место его опустошиша. Не помяни наших беззаконій первых; скоро да предварят ны щедроты твоя, Господи, яко обнищавом зело. Помози нам, Боже, спасителю наш, славы ради имене твоего; Господи, избави ны и очти грехи наша имене ради твоего. Да не когда рекут языцы; Господе есть Бог их? и да увестся во языцех пред очима нашими отмщеніе крове раб твоих пролитыя. Да внидет пред тя воздыханіе окованных; по величію мышцы твоя снабди сыны умерщвленных. Воздаждь соседом нашим седмерицею в недра их поношеніе их, имже поносиша тя, Господи. Мы же людіе твои и овцы пажити твоя исповемыся тебе, Боже, во век, в род и род возвестим хвалу твою.

Псалом 79.

Пасый Израиля вонми; наставляй яко овча іосифа, седяй на херувімах, явися; пред ефремом и веніаміном и манассіем воздвигни силу твою, и приди во еже спасти нас. Боже, обрати ны, и просвети лице твое, и спасемся. Господи Боже сил, доколе гневаешися на молитву раб твоих? Напитаеши нас хлебом слезным, и напоиши нас слезами в меру. Положил еси нас в пререканіе соседом нашим, и врази наши подражниша ны. Господи Боже сил, обрати ны, и просвети лице твое, и спасемся. Віноград из египта пренесл еси; изгнал еси языки, и насадил еси и; путесотворил еси пред ним, и насадил еси коренія его, и исполни землю. Покры горы сень его, и ветвія его кедры Божія; простре розги своя до моря, и даже до рек отрасли его. Вскую низложил еси оплот его, и обимают и вси мимоходящіи путем? Озоба и вебрь от дубравы, и уединенный дивій пояде и. Боже сил, обратися убо, и призри с небесе и виждь, и посети віноград сей; и соверши и, егоже насади десница твоя, и на сына человеческого, егоже укрепил еси себе. Пожжен огнем и раскопан; от запрещенія лица твоего погибнут. Да будет рука твоя на мужа десницы твоя и на сына человеческого, егоже укрепил еси себе, и не отступим от тебе; оживиши ны, и имя твое призовем. Господи Боже

сил, обрати ны, и просвети лице твое, и спасемся.

Псалом 80.

Радуйтеся Богу помощнику нашему, воскликните Богу іаковлю; приимите псалом и дадите тимпан, псалтирь красен с гусльми; вострубите в новомчїи трубою, во благознаменитый день праздника вашего; яко повеленіе Израилеви есть, и судьба Богу іаковлю. Свиденіе во іосифе положи е, внегода изыти ему от земли египетскія; языка, егоже не ведяше, услыша. Отят от бремене хребет его; руце его в коши поработасте. В скорби призвал мя еси, и избавих тя; услышах тя в тайне бурне; искусих тя на воде пререканія. Слышите, людіе мои, и засвидетелствую вам, Израилю, аще послушаеши мене; не будет тебе бог нов, ниже поклонишися богу чуждему. Аз бо есмь Господь Бог твой, изведый тя от земли египетскія; разшири уста твоя, и исполню я. И не послушаша людіе мои гласа моего, и Израиль не внят ми; и отпустих я по начинаніем сердец их, пойдут в начинаніих своих. Аще быша людіе мои послушали мене, Израиль аще бы в пути моя ходил; ни о чесомже убо враги его смирил бых, и на оскорбляющыя их возложил бых руку мою. Врази Господни солгаша ему, и будет время их в век; и напита их от тука пшенична, и от камене меда насыти их.

Псалом 81.

Бог ста в сонме богов, посреде же боги разсудит. Доколе судите неправду, и лица грешников приемлете? Судите сиру и убогу, смирена и нища оправдайте; измите нища и убога, из руки грешничи избавите его. Не познаша, ниже уразумеша, во тме ходят; да подвижатся вся основанія земли. Аз рех; бози есте, и сынове вышняго вси; вы же яко человецы умираете, и яко един от князей падаете. Воскрсни, Боже, суди земли; яко ты наследиши во всех языцех.

Псалом 82.

Боже, кто уподобится тебе? не премолчи, ниже укротися, Боже; яко се, врази твои возшумеша, и ненавидящїи тя воздвигоша главу. На люди твоя лукавоваша волею, и совещаша на святыя твоя. Реша; приидите и потребим я от язык, и не помянется имя Израилево ктому. Яко совещаша единомышленіем вкупе, на тя завет завещаша; селенія ідумейска и ісмаилїте, моав и агаряне, гевал и аммон и амалик, иноплеменницы с живущими в тире; ибо и ассур прииде с ними, быша в заступленіе сыновом лотовым; Сотвори им яко мадіаму и сісаре, яко іавїму в потоце кіссове; потребишася во аендоре, быша яко гной земный. Положи князи их яко орива и зива, и зевеа и салмана, вся князи их, иже реша; да наследим себе святилище Божіе. Боже мой, положи я яко коло, яко трость пред лицем ветра. Яко огонь попаляяй дубравы, яко пламень пожигаая горы; тако поженеши я бурєю твоею, и гневом твоим смятеши я. Исполни лица их безчестія, и взыщут имене твоего, Господи. Да

постыдятся и смятутся в век века, и посрамятся и погибнут. И да познают, яко имя тебе Господь, ты един вышній по всей земли.

Псалом 83.

Коль возлюбленна селенія твоя, Господи сил. Желает и скончается душа моя во двory Господни; сердце мое и плоть моя возрадовастаня о Боже живе. Ибо птица обрете себе храмину, и горлица гнездо себе, идеже положит птенцы своя, олтари твоя, Господи сил, царю мой и Боже мой. Блажени живуци в дому твоём; в веки веков восхвалят тя. Блажен муж, емуже есть заступленіе его у тебе; восхожденія в сердцы своем положи, во юдоли плачевней, в месте, еже положи; ибо благословеніе даст законополагаяй. Пойдут от силы в силу; явится Бог богов в Сионе. Господи Боже сил, услыши молитву мою, внуши, Боже іаковль. Защитниче наш, виждь, Боже, и призри на лице христа твоего. Яко лучше день един во дворех твоих паче тысящ; изволих приметатися в дому Бога моего паче, неже жити ми в селеніих грешничих. Яко милость и истину любит Господь, Бог благодть и славу даст; Господь не лишит благих ходящих незлобіем. Господи Боже сил, блажен человек уповаяй на тя.

Псалом 84.

Благоволил еси, Господи, землю твою, возвратил еси плен іаковль. Оставил еси беззаконія людій твоих, покрыл еси вся грехи их. Укротил еси весь гнев твой, возвратился еси от гнева ярости твоея. Возврати нас, Боже спасеній наших, и отврати ярость твою от нас. Еда во веки прогневаешия на ны? или простреши гнев твой от рода в род? Боже, ты обращаешия оживиши ны, и людіе твои возвеселятся о тебе. Яви нам, Господи, милость твою, и спасеніе твое даждь нам. Услышу, что речет о мне Господь Бог; яко речет мир на люди своя, и на преподобныя своя, и на обращающыя сердца к нему. Обаче близ боящихся его спасеніе его, вселити славу в землю нашу. Милость и истина сретостеся, правда и мир облобызастася; истина от земли возсія, и правда с небесе приниче; ибо Господь даст благодть, и земля наша даст плод свой. Правда пред ним предидет, и положит в путь стопы своя.

Псалом 85.

Приклони, Господи, ухо твое, и услыши мя; яко нищ и убог есмь аз. Сохрани душу мою, яко преподобен есмь; спаси раба твоего, Боже мой, уповающаго на тя. Помилуй мя, Господи, яко к тебе воззову весь день. Возвесели душу раба твоего; яко к тебе взях душу мою. Яко ты, Господи, благ и кроток и многомилостив всем призывающым тя. Внуши, Господи, молитву мою и вонми гласу моленія моего. В день скорби моя воззвах к тебе, яко услышал мя еси. Несть подобен тебе в бозех, Господи, и несть по делом твоим. Все языцы, елики сотворил еси, приидут и поклонятся пред тобою, Господи, и прославят имя твое; яко велій еси ты и творяй чудеса, ты еси Бог един. Настави мя, Господи, на путь твой, и пойду во

истине твоей; да возвеселится сердце мое бояться имене твоего. Исповемся тебе, Господи Боже мой, всем сердцем моим и прослаблю имя твое в век; яко милость твоя велія на мне, и избавил еси душу мою от ада преисподнейшаго. Боже, законопреступницы восташа на мя, и сонм державных взыскаша душу мою, и не предложиша тебе пред собою. И ты, Господи Боже мой, щедрый и милостивый, долготерпеливый и многомилостивый и истинный, призри на мя и помилуй мя; даждь державу твою отроку твоему и спаси сына рабы твоея. Сотвори со мною знаменіе во благо; и да видят ненавидящіи мя, и постыдятся, яко ты, Господи, помогл ми и утешил мя еси.

Псалом 86.

Основанія его на горах святых; любит Господь врата Сіоня паче всех селеній іаковлих. Преславная глаголашася о тебе, граде Божій. Помяну раав и вавилоня вѣдущим мя; и се, иноплеменницы и тир и людіе ефіопстіи, сіи быша тамо. Мати Сіон речет; человек и человек родися в нем, и той основа и вышній. Господь повесть в писаніи людіи и князей, сих бывших в нем. Яко веселящихся всех жилище в тебе.

Псалом 87.

Господи Боже спасенія моего, во дни возвах и в ноци пред тобою; да внидет пред тя молитва моя, приклони ухо твое к моленію моему. Яко исполнися зол душа моя, и живот мой аду приближися. Привменен бых с низходящими в ров; бых яко человек без помощи, в мертвых свободь; яко язвенніи спящіи во гробе, ихже не помянул еси ктому, и тіи от руки твоея отриновени быша. Положиша мя в рове преисподнем, в темных и сени смертней. На мне утвердися ярость твоя, и вся волны твоя навел еси на мя. Удалил еси знаемых моих от мене; положиша мя мерзость себе; предан бых и не исхождах. Очи мои изнемогосте от нищеты; возвах к тебе, Господи, весь день, воздох к тебе руце мои. Еда мертвыми твориши чудеса? или врачеве воскресят, и исповедятся тебе? Еда повесть кто во гробе милость твою, и истину твою в погибели? Еда познана будут во тме чудеса твоя, и правда твоя в земли забвенней? И аз к тебе, Господи, возвах, и утро молитва моя предварит тя. Вскую, Господи, отрееши душу мою? отвращаеши лице твое от мене? Нищ есмь аз, и в трудех от юности моея; вознесжеся смирихся и изнемогах. На мне преидоша гневи твои, устрашенія твоя возмутиша мя; обыдоша мя яко вода весь день, одержаша мя вкупе. Удалил еси от мене друга и искренняго, и знаемых моих от страстей.

Псалом 88.

Милости твоя, Господи, во век воспую, в род и род возведу истину твою усты моими. Зане рекл еси; в век милость созиждется; на небесех уготовится истина твоя. Завещах завет избранным моим, кляхся Давиду рабу моему; до века уготоваю семя твое, и созижду в род и род престол

твой. Исповедят небеса чудеса твоя, Господи, ибо истину твою в церкви святых. Яко кто во облацех уравнился Господеви? уподобится Господеви в сынех Божіих? Бог прославляемъ в совете святых, велий и страшен есть над всеми окрестными его. Господи Боже сил, кто подобен тебе? силен еси, Господи, и истина твоя окрест тебе. Ты владычествуеши державою морскою; возмущеніе же волн его ты укрочаеши. Ты смирил, еси, яко язвена, гордаго; мышцею силы твоя расточил еси враги твоя. Твоя сут небеса, и твоя есть земля; вселенную и исполненіе ея ты основал еси. Север и море ты создал еси; фавор и ермон о имени твоём возрадуется. Твоя мышца с силою; да укрепится рука твоя, и вознесется десница твоя. Правда и судьба уготованіе престола твоего; милость и истина предидете пред лицом твоим. Блажени людіе ведуці воскликновеніе; Господи, во свете лица твоего пойдут, и о имени твоём возрадуются весь день, и правдою твоею вознесутся. Яко похвала силы их ты еси, и во благоволеніи твоём вознесется рог наш; яко Господне есть заступленіе, и святаго Израилева царя нашего. Тогда глал еси в виденіи сыновом твоим, и рекл еси; положих помощь на сильнаго, вознесох избраннаго от людіи моих; обретох Давида раба моего, елеем святым моим помазах его. Ибо рука моя заступит его, и мышца моя укрепит его. ничтоже успеет враг на него, и сын беззаконія не приложит озлобити его. И ссеку от лица его враги его, и ненавидящія его побужду; и истина моя и милость моя с ним, и о имени моем вознесется рог его; и положу на мори руку его, и на реках десницу его. Той призовет мя; оц мой еси ты, Бог мой и заступник спасенія моего. И аз первенца положу его, высока паче царей земных; в век сохраню ему милость мою, и завет мой верен ему; и положу в век века семя его, и престол его яко дніе неба. Аще оставят сынове его закон мой, и в судьбах моих не пойдут; аще оправданія моя осквернят, и заповедій моих не сохранят; посещу жезлом беззаконія их, и ранами неправды их, милость же мою не разорю от них, ни преврежду во истине моей; ниже оскверню завета моего, и исходящих от уст моих не отвергуся. Единою кляхся о святем моем; аще Давиду солжу? Семя его во век пребудет, и престол его яко солнце предо мною, и яко луна совершена в век, и свидетель на небеси верен. Ты же отринул еси и уничижил, негодовал еси помазаннаго твоего; разорил еси завет раба твоего, осквернил еси на земли святыню его; разорил еси вся оплоты его, положил еси твердая его страх. Расхищаху его вси мимоходящіи путем, бысть поношеніе соседом своим. Возвысил еси десницу стужающих ему, возвеселил еси вся враги его; отвратил еси помощь меча его и не заступил еси его во брани; разорил еси от очищенія его, престол его на землю повергл еси; умалил еси дни време не его, обліял еси его студом. Доколе, Господи, отвращаешия в конец, разжжется яко огонь гнев твой? Помяни, кій мой состав; еда бо всуе создал еси вся сыны человеческія? Кто есть человек, иже поживет и не узрит смерти, избавит душу свою из руки адовы? Господе суть милости твоя древнія, Господи, имиже клялся еси Давиду во истине твоей? Помяни, Господи, поношеніе раб твоих, еже удержях в недре моем многих язык; имже поносиша врази твои, Господи, имже поносиша измененію хріста твоего. Благословен Господь во век;

буди, буди.

Псалом 89.

Господи, прибежище был еси нам в род и род. Прежде даже горам не быти и создатися земли и вселенней, и от века и до века ты еси. Не отврати человека во смирение, и рекл еси; обратитесь, сынове человечестии. Яко тысяща лет пред очима твоима, Господи, яко день вчерашній, иже мимо иде, и стража ночная. Уничужения их лета будут; утро яко трава мимо идет, утро процветет и преидет; на вечер отпадет, ожестеет и изсхнет; яко исчезохом гневом твоим, и яростию твоею смутихомся. Положил еси беззаконія наша пред тобою, век наш в просвещение лица твоего. Яко вси дніе наши оскудеша, и гневом твоим исчезохом; лета наша яко паучина поучахуся; дніе лет наших в нихже седмьдесят лет, аще же в силах, осмьдесят лет, и множае их труд и болезнь; яко прииде кротость на ны, и накажемся. Кто весть державу гнева твоего, и от страха твоего ярость твою изчести? Десницу твою тако скажи ми, и окованныя сердцем в мудрости. Обратися, Господи, доколе? и умолен буди на рабы твоя. Исполнихомся заутра милости твоя, Господи, и возрадовахомся и возвеселихомся; во вся дни наша возвеселихомся, за дни, в няже смирил ны еси, лета, в няже видехом злая. И призри на рабы твоя и на дела твоя, и настави сыны их. И буди светлость Господа Бога нашего на нас, и дела рук наших исправи на нас, и дело рук наших исправи.

Псалом 90.

Живой в помощи вышняго, в крове Бога небнаго водворится, речет Господеви; заступник мой еси и прибежище мое, Бог мой, и уповаю на него. Яко той избавит тя от сети ловчи и от словесе мятежна; плещма своима осенит тя, и под криле его надеешься; оружием обыдет тя истина его. Не убоишися от страха ночнаго, от стрелы летящія во дни, от вещи во тме преходящія, от нападения и беса полуденнаго. Падет от страны твоя тысяща, и тма одесную тебе, к тебе же не приблизится; обаче очима твоима смотриши и воздаяние грешников узриши. Яко ты, Господи, упование мое; вышняго положил еси прибежище твое. Не приидет к тебе зло, и рана не приблизится телеси твоему; яко ангелом своим заповесть о тебе, сохранити тя во всех путех твоих. На руках возмут тя, да не когда преткнеши о камень ногу твою; на аспида и василиска наступиши, и попереши льва и змія. Яко на мя упова, и избавлю и; покрю и, яко позна имя мое. Воззовет ко мне, и услышу его; с ним есмь в скорби, изму его и прославлю его; долготою дній исполню его и явлю ему спасение мое.

Псалом 91.

Благо есть исповедатися Господеви и пети имени твоему, вышній; возвещати заутра милость твою и истину твою на всяку ночь, в

десятоструннем псалтири с песнію в гуслах. Яко возвеселил мя еси, Господи, в твореніи твоєм, и в делех руку твоєю возрадуюся. Яко возвеличишася дела твоя, Господи; зело углубишася помышленія твоя. Муж безумен не познает, и неразумив не разумеет сих. Внегда прозябоша грешницы яко трава, и проникоша вси делающіи беззаконіе, яко да потребятся в век века; ты же вышній во век, Господи. Яко се, врази твои, Господи, яко се, врази твои погибнут, и разыдутся вси делающіи беззаконіе. И вознесетя яко единорога рог мой, и старость моя в елеи мастите; и возре око мое на враги моя, и востающыя на мя лукавнующыя услышит ухо мое. Праведник яко фініх процветет; яко кедр, иже в ліване, умножится. Насаждени в дому Господни во дворех Бога нашего процветут; еще умножатся в старости мастите, и благопріємлюще будут. Да возвестят, яко прав Господь Бог наш, и несть неправды в нем.

Псалом 92.

Господь воцарися, в лепоту облечеса; облечеса Господь в силу и препоясася; ибо утверди вселенную, яже не подвижится. Готов престол твой оттоле; от века ты еси. Воздвигоша реки, Господи, воздвигоша реки гласы своя; возмут реки сотрениа своя, от гласов вод многих. Дивны высоты морскія; дивен в высоких Господь. Свиденія твоя уверишася зело. Дому твоему подобает святыня, Господи, в долготу дній.

Псалом 93.

Бог отмщеній Господь, Бог отмщеній не обинулся есть. Вознесися, судяй земли, воздаждь воздаяніе гордым. Доколе грешницы, Господи, доколе грешницы восхвалятся? Провещают и возглаголют неправду, возглаголют вси делающіи беззаконіе? Люди твоя, Господи, смириша, и достояніе твое озлобиша; вдовицу и сира умориша, и пришелца убиша, и реша; не узрит Господь, ниже уразумеет Бог іаковль. Разумейте же, безумніи в людех, и буіи некогда, умудритесь; насаждей ухо, не слышит ли? или создавый око, не сматрывает ли? наказуяй языки, не обличит ли, учай человека разуму? Господь весть помышленія человеческая, яко суть суетна. Блажен человек, егоже аще накажеша, Господи, и от закона твоего научиши его; укротити его от дній лютых, дондеже изрыется грешному яма. Яко не отринет Господь людій своих, и достояніа своего не оставит; дондеже правда обратится на суд, и держащіяся ея вси правіи сердцем. Кто встанет ми на лукавнующыя? или кто спредстанет ми на делающыя беззаконіе? Аще не Господь помог бы ми, в мале вселилася бы во ад душа моя. Аще глаголах; подвижется нога моя, милость твоя, Господи, помогаша ми; по множеству болезней моих в сердца моем, утешенія твоя возвеселиша душу мою. Да не пребудет тебе престол беззаконія, созидаый труд на повеленіе. Уловят на душу праведничу, и кровь неповинную осудят. И бысть мне Господь в прибежище, и Бог мой в помощь упованія моего; и воздаст им Господь беззаконіе их, и по лукавствію их погубит я Господь Бог нашъ.

Псалом 94.

Приидите, возрадуемся Господеви, воскликнем Богу спасителю нашему; предварим лице его во исповеданіи, и во псалмех воскликнем ему; яко Бог велій Господь, и царь велій по всей земли; яко в руке его вси концы земли, и высоты гор того суть. Яко того есть море, и той сотвори е, и сушу руке его создасте. Приидите, поклонимся и припадем ему, и восплачемся пред Господем сотворшим нас; яко той есть Бог наш, и мы людіе пажити его и овцы руки его. Днесъ аще глас его услышите, не ожесточите сердец ваших, яко в прогневаніи, по дни искушенія в пустыни; в онъже искусиша мя отцы ваши, искусиша мя, и видеша дела моя. Четырдесятъ лет негодовах рода того, и рех; присно заблуждают сердцем, ти же не познаша путій моих; яко кляхся во гневе моем, аще внидут в покой мой.

Псалом 95.

Воспойте Господеви песнь нову, воспойте Господеви вся земля; воспойте Господеви, благословите имя его; благовестите день от дне спасеніе его. Возвестите во языцех славу его, во всех людех чудеса его. Яко велій Господь и хвален зело, страшен есть над всеми боги. Яко вси бози язык бесове; Господь же небеса сотвори. Исповеданіе и красота пред ним, святыня и великолепіе во святыле его. Принесите Господеви, отечествія язык, принесите Господеви славу и честь. Принесите Господеви славу имени его; возьмите жертвы и входите во дворы его. Поклонитесь Господеви во дворе святем его; да подвижится от лица его вся земля. Рцйте во языцех: яко Господь воцарися; ибо исправи вселенную, яже не подвижится; судит людем правостію. Да возвеселятся небеса, и радуется земля; да подвижится море и исполненіе его; возрадуются поля, и вся яже на них; тогда возрадуются вся древа дубравная от лица Господня, яко грядет, яко грядет судити земли; судити вселенней в правду, и людем истиною своею.

Псалом 96.

Господь воцарися, да радуется земля, да веселятся острова мнози. Облак и мрак окрест его; правда и судьба исправленіе престола его. Огнь пред ним предидет и попалит окрест враги его. Осветиша молнія его вселенную; виде и подвижеся земля. Горы яко воск растаяша от лица Господня, от лица Господа всея земли. Возвестиша небеса правду его, и видеша вси людіе славу его. Да постыдятся вси кланяющіися истуканным, хвалящіися о ідолех своих; поклонитесь ему, вси ангели его. Слыша и возвеселися Сіон, и возрадовашася дщери іудейскія, судеб ради твоих, Господи; яко ты Господь вышній над всею землею, зело превознеслся еси над всеми боги. Любящии Господа, ненавидите злая; хранит Господь души преподобных своих, из руки грешничи избавит я. Свет возсія праведнику, и правым сердцем веселіе. Веселитесь, праведнии, о Господе, и исповедайте память святыни его.

Псалом 97.

Воспойте Господеви песнь нову, яко дивна сотвори Господь; спасе его десница его и мышца святая его. Слова Господь спасение свое, пред языки откры правду свою. Помяну милость свою Якову и истину свою дому Израилеву; видеша вси концы земли спасение Бога нашего. Воскликните Богови, вся земля, воспойте и радуйтесь и пойте. Пойте Господеви в гуслах, в гуслах и гласе псаломсте, в трубах кованных и гласом трубы рожаны; вострубите пред царем Господем. Да подвижится море и исполнение его, вселенная и вси живущи на ней. Реки воспещут рукою вкупе, горы возрадуются от лица Господня, яко грядет, яко идет судити земли; судити вселенной в правду, и людям правостію.

Псалом 98.

Господь воцарися, да гневаются люди; седяи на херувимех, да подвижится земля. Господь в Сионе велик, и высок есть над всеми людьми. Да исповедятся имени твоему великому, яко страшно и свято есть. И честь царева суд любит; ты уготовал еси правоты, суд и правду во Якове ты сотворил еси. Возносите Господа Бога нашего и поклоняйтесь подножью ногу его, яко свято есть. Моисей и аарон во иереех его, и самуил в призывающих имя его; призываху Господа, и той послушаше их. В столпе облачне глаше к ним; яко храняху свидения его и повеления его, яже даде им. Господи Боже наш, ты послушал еси их; Боже, ты милостив бывал еси им, и мщяя на вся начинания их. Возносите Господа Бога нашего и поклоняйтесь в горе святей его; яко свят Господь Бог наш.

Псалом 99.

Воскликните Богови вся земля; работайте Господеви в веселии, внидите пред ним в радости. Уведите, яко Господь той есть Бог наш; той сотвори нас, а не мы; мы же люди его и овцы пажити его. Внидите во врата его во исповедании, во двory его в пених; исповедайтесь ему, хвалите имя его. Яко благ Господь, в век милость его, и даже до рода и рода истина его.

Псалом 100.

Милость и суд воспою тебе, Господи; пою и разумею в пути непорочно; когда приидеши ко мне? прехождах в незлобии сердца моего посреде дому моего. Не предлагал пред очима моима вещь законопреступную; творящая преступление возненавидех. не прильпе мне сердце строптиво; уклоняющагося от мене лукаваго не познах. Оклеветавшаго тай искренняго своего, сего изгоняю; гордым оком и несатым сердцем, с сим не ядах. Очи мои на верныя земли, посадити я со мною; ходяи по пути непорочно, сей ми служаше. Не живяше посреде дому моего творяи гордыню; глаголяи неправедная не исправляше пред очима моима. Воутрия избивах вся грешныя земли, еже потребити от града Господня

вся делающыя беззаконіе.

Псалом 101.

Господи, услыши молитву мою, и вопль мой к тебе да приидет. Не отврати лица твоего от мене; в оньже аще день скорблю, приклони ко мне ухо твое; в оньже аще день призову тя, скоро услыши мя. Яко исчезоша яко дым дніе мои, и кости моя яко сушило сосхошася. Уязвлен бых яко трава, и изсше сердце мое, яко забых снести хлеб мой. От гласа воздыханія моего прильпе кость моя плоти моей. Уподобихся неясоти пустынной, бых яко ночный вран на развалине. Бдех и бых яко птица особящаяся на кровле. Весь день поношаху ми врази мои, и хвалящіи мя мною кленяхуся. Зане пепел яко хлеб ядох и питіе мое с плачем растворях, от лица гнева твоего и ярости твоея; яко вознес низвергл мя еси. Дніе мои яко сень уклонишася, и аз яко сено изсхох. Ты же, Господи, во век пребываеши, и память твоя в род и род. Ты воскрес ущедриши Сіона; яко время ущедрити его, яко прииде время. Яко благоволиша раби твои о каменіи его, и персть его ущедрят. И убоятся языцы имене Господня, и вси царіе земстіи славы твоея; яко созиждет Господь Сіона и явится во славе своей. Призре на молитву смиренных и не уничижи моленія их. Да напишется сіе в род ин, и людіе зиждеміи восхвалят Господа; яко приниче с высоты святыя своея, Господь с небесе на землю призре, услышати воздыханіе окованных, разрешити сыны умерщвленных; возвестити в Сіоне имя Господне и хвалу его во іерлиме, вегда собратися людем вкупе и царем, еже работати Господеви. Отвеща ему на пути крепости его; умаленіе дній моих возвести ми; не возведи мене во преполовеніе дній моих; в роде родов лета твоя. В началех ты, Господи, землю основал еси, и дела руку твоею суть небеса. Та погибнут, ты же пребываеши; и вся яко риза обетшают, и яко одежду свіеши я, и изменятся. Ты же тойжде еси, и лета твоя не оскудеют. Сынове раб твоих вселятся, и семья их во век исправится.

Псалом 102.

Благослови, душе моя, Господа, и вся внутренняя моя, имя святое его; благослови, душе моя, Господа, и не забывай всех воздаяній его; очищающаго вся беззаконія твоя, изцеляющаго вся недуги твоя, избавляющаго от истленія живот твой, венчающаго тя милостію и щедротами, исполняющаго во благих желаніе твое; обновится яко орля юность твоя. Творяй милостыни Господь и судьбу всем обидимым. Сказа пути своя моисеови, сыновом Израилевым хотенія своя. Щедр и милостив Господь, долготерпелив и многомилостив. Не до конца прогневаются, ниже во век враждует; не по беззаконіем нашим сотворил есть нам, ниже по грехом нашим воздал есть нам. Яко по высоте небесней от земли, утвердил есть Господь милость свою на боящихся его; елико отстоят востоцы от запад, удалил есть от нас беззаконія наша. Якоже щедрит отец сыны, ущедри Господь боящихся его. Яко той позна созданіе наше, помяну, яко персть есмы. Человек, яко трава дніе его, яко

цвет селный, тако оцветет; яко дух пройде в нем, и не будет, и не познает ктому места своего. Милость же Господня от века и до века на боящихся его, и правда его на сынех сынов, хранящих завет его и помнящих заповеди его творити я. Господь на небеси уготова престол свой, и цартво его всеми обладает. Благословите Господа, вси ангели его, сильнии крепостию, творящи слово его, услышати глас словес его. Благословите Господа, вся силы его, слуги его, творящи волю его. Благословите Господа, вся дела его на всяком месте владычества его; благослови, душе моя, Господа.

Псалом 103.

Благослови, душе моя, Господа. Господи Боже мой, возвеличился еси зело; во исповедание и в велелепоту облеклся еси; одеяйся светом яко ризою, простираяй небо яко кожу; покрывай водами превыспренность своя, полагаяй облаки на восхождение свое, ходяй на крилу ветреню; творяй ангелы своя духи, и слуги своя пламень огненный; основаяй землю на тверди ея; не преклонится в век века. Бездна яко риза одеяние ея, на горах станут воды; от запрещенія твоего побегнут, от гласа грома твоего убоятся. Восходят горы, и низходят поля, в место еже основал еси им. Предел положил еси, егоже не прейдут, ниже обратятся покрыти землю. Посылаяй источники в дебрех, посреде гор пройдут воды. Напаяют вся звери селныя, ждут онагри в жажду свою. На тех птицы небесныя привитают; от среды каменія дадут глас. Напаяяй горы от превыспренных своих; от плода дел твоих насытится земля. Прозябаяй траву скотом, и злак на службу человеком, извести хлеб от земли; и вино веселит сердце человека, умастити лице елеем; и хлеб сердце человека укрепит. Насытятся древа польская, кедрі ливанстіи, ихже еси насадил; тамо птицы вогнездятся, еродіево жилище предводителствует ими. Горы высокія еленем, камень прибежище заяцем. Сотворил еси луну во времена; солнце позна запад свой. Положил еси тму, и бысть ночь, в нейже пройдут вси зверіе дубравніи, скимни рыкающи восхитити и взискати от Бога пищу себе. Возсія солнце, и собращася, и в ложах своих лягут. Изыдет человек на дело свое и на делание свое до вечера. Яко возвеличишася дела твоя, Господи; вся премудростию сотворил еси; исполнися земля твари твоя. Сіе море великое и пространное; тамо гади, ихже несть числа, животная малая с великими; тамо корабли преплавают, змій сей, егоже создал еси ругатися ему. Вся к тебе чают, дати пищу им во благо время. Давшу тебе им, соберут; отверзшу тебе руку, всяческая исполнятся благости; отвращшу же тебе лице, возьмутся; отимеши дух их, и исчезнут и в персть свою возвратятся; послещи дха твоего, и созиждутся, и обновиши лице земли. Буди слава Господня во веки; возвеселится Господь о делех своих; призираяй на землю и творяй ю трястися; прикасайся горам, и дыматся. Воспою Господеви в животе моем, пою Богу моему, дондеже есмь; да усладится ему беседа моя, аз же возвеселюся о Господе. Да исчезнут грешницы от земли, и беззаконницы, якоже не быти им. Благослови, душе моя,

Господа.

Псалом 104.

Исповедайтесь Господеви и призывайте имя его, возвестите во языцех дела его; воспойте ему и пойте ему, поведите вся чудеса его. Хвалитесь о имени святем его; да возвеселится сердце ищущих Господа; взыщите Господа и утвердитесь, взыщите лица его выну. Помяните чудеса его, яже сотвори, чудеса его и судьбы уст его, семя авраамле раби его, сынове іаковли избранніи его. Той Господь Бог наш; по всей земли судьбы его. Помяну в век завет свой, слово, еже заповеда в тысящы родов, еже завеща аврааму, и клятву свою ісааку; и постави ю іакову в повеленіе и Израилю в завет вечен, гля; тебе дам землю ханааню, уже достоянія вашего. Внегда быти им малым числом, малейшим и пришелцем в ней, и преидоша от языка в язык и от царствія в люди ины; не остави человека обидети их и обличи о них цари; не прикасайтесь помазанным моим, и во пророцех моих не лукавните. И призва глад на землю; всяко утвержденеіе хлебное сотры. Посла пред ними человека; в раба продан бысть іосиф. Смириша во оковах нозе его, железо пройде душа его, дондеже прииде слово его; слово Господне разжже его. Посла царь и разреши его; князь людіи, и отпусти его. Постави его господина дому своему и князя всему стяжанію своему, наказати князи его яко себе и старцы его умудрити. И вниде Израиль во египет, и іаков пришелствова в землю хамову. И возрасти люди своя зело и укрепи я паче врагов их. Преврати сердце их возненавидети люди его, лесьть сотворити в рабех его. Посла моисеа раба своего, аарона, егоже избра себе; положи в них словеса знаменій своих и чудес своих в земли хамове. Посла тму и помрачи, яко преогорчиша словеса его. Преложи воды их в кровь и измори рыбы их. Воскипе земля их жабами в сокровищницах царей их. Рече, и приидоша песія мухи и скніпы во вся пределы их. Положи дожди их грады, огнь попадающъ в земли их; и порази вінограды их и смоквы их, и сотры всякое древо предел их. Рече, и приидоша пружи и гусеницы, имже не бе числа, и снедоша всяку траву в земли их, и поядоша всяк плод земли их. И порази всякаго первенца в земли их, начаток всякаго труда их; и изведе я с серебром и златом; и не бе в коленех их боляй. Возвеселися египет во исхожденеіи их; яко нападе страх их на ня. Распростре облак в покров им, и огнь, еже просветити им нощію. Просиша, и приидоша крастели, и хлеба небеснаго насыти я; разверзе камень, и потекоша воды, потекоша в безводных реки; яко помяну слово святое свое, еже ко аврааму рабу своему. И изведе люди своя в радости и избранныя своя в веселіи. И даде им страны язык, и труды людіи наследоваша; яко да сохранят оправданія его и закона его взыщут.

Псалом 105.

Исповедайтесь Господеви, яко благ, яко в век милость его. Кто возглаголет силы Господни, слышаны сотворит вся хвалы его? Блажени хранящіи суд и творящіи правду во всякое время. Помяни нас, Господи,

во благоволеніи людій твоих, посети нас спасеніем твоим, видети во благи избранныя твоя, возвеселитися в веселіи языка твоего, хвалитися с достояніем твоим. Согрешихом со отцы нашими, беззаконновахом, неправдовахом; отцы наши во египте не разумеша чудес твоих, ни помянуша множества милости твоея; и преогорчиша восходяще в чермное море. И спасе их имене своего ради, сказати силу свою; и запрети чермному морю, и изсяче; и настави я в бездне яко в пустыни. И спасе я из руки ненавидящих и избави я из руки врагов. Покры вода стужающыя им; ни един от них избысть. И вероваша словеси его и воспеша хвалу его. Ускориша, забыша дела его, не стерпеша совета его; и похотеша желанію в пустыни и искусиша Бога в безводней. И даде им прошеніе их, посла сытость в души их. И прогневаша моисеа в стану, аарона святаго Господня. Отверзеса земля и пожре дафана и покры на сонмищи авірона; и разжжеса огонь в сонме их, пламень попали грешники. И сотвориша телца в хориве и поклонишася истуканному; и измениша славу его в подобіе телца ядущаго траву. И забыша Бога спасающаго их, сотворшаго велія во египте, чудеса в земли хамове, страшная в мори чермнем. И рече потребити их, аще не бы моисей избранный его стал в сокрушеніи пред ним, возвратити ярость его, да не погубит их. И уничижиша землю желанную, не яша веры словеси его; и поропташа в селеніих своих, не услышаша гласа Господня. И воздвиже руку свою на ня, низложити я в пустыни, и низложити семя их во языцех, и расточити я в страны. И причастишася веельфегору и снесоша жертвы мертвых; и раздражиша его в начинаніих своих, и умножися в них паденіе. И ста фінеес и умилостиви, и преста сечь; и вменися ему в правду, в род и род до века. И прогневаша его на воде пререканія, и озлоблен бысть моисей их ради; яко преогорчиша дух его и разнствова устнама своима. Не потребиша языки, яже рече Господь им. И смесишася во языцех и навикоша делом их; и поработаша истуканным их, и бысть им в соблазн. И пожроша сыны своя и дщери своя бесовом, и проліяша кровь неповинную, кровь сынов своих и дщерея, яже пожроша истуканным ханаанским; и убіена бысть земля их кровьюми и осквернися в делех их; и соблудиша в начинаніих своих. И разгневался яростію Господь на люди своя и омерзи достояніе свое; и предаде я в руки врагов, и обладаша ими ненавидящіи их. И стужиша им врази их; и смиришася под руками их. Множицею избави я; тіи же преогорчиша его советом своим, и смиришася в беззаконіих своих. И виде Господь, внегода скорбети им, внегода услышаше моленіе их; и помяну завет свой, и раскаяся по множеству милости своея; и даде я в щедроты пред всеми пленившими я. Спаси ны, Господи, Боже наш, и собери ны от язык, исповедатися имени твоему святому, хвалитися во хвале твоей. Благословен Господь Бог Израилев от века и до века. И рекут вси людіе; буди, буди.

Псалом 106.

Исповедайтесь Господеви, яко благ, яко в век милость его. Да рекут избавленіи Господем, ихже избави из руки врага, и от стран собра их,

от восток и запад, и севера и моря; заблудиша в пустыни безводней, пути града обителнаго не обретоша; алчуще и жаждуще, душа их в них изчезе. И воззваша ко Господу, внегда скорбети им, и от нужд их избави я; и настави я на путь прав, внити во град обителный. Да исповедят Господеви милости его и чудеса его сыновом человеческим; яко насытил есть душу тщу, и душу алчущу исполни благ; сидящия во тме и сени смертней, окованныя нищетою и железом, яко преогорчиша словеса Божія, и совет вышняго раздражиша. И смирися в трудех сердце их, и изнемогоша, и не бе помагаяй. И воззваша ко Господу, внегда скорбети им, и от нужд их спасе я; и изведе я из тмы и сени смертныя, и узы их растерза. Да исповедят Господеви милости его и чудеса его сыновом человеческим; яко сокруши врата медная, и вереи железныя сломи. Воспріят я от пути беззаконія их; беззаконій бо ради своих смиришася. Всякаго брашна возгнушася душа их, и приближишася до врат смертных. И воззваша ко Господу, внегда скорбети им, и от нужд их спасе я; посла слово свое, и изцели я, и избави я от растлений их. Да исповедят Господеви милости его и чудеса его сыновом человеческим; и да пожрут ему жертву хвалы и да возвестят дела его в радости. Сходящіи в море в кораблех, творящіи деланія в водах многих, тїи видеша дела Господня и чудеса его во глубине. Рече, и ста дух бурен, и вознесошася волны его; восходят до небес и низходят до бездн; душа их в злых таяше; смятошася, подвигошася яко пїяный, и вся мудрость их поглощена бысть. И воззваша ко Господу, внегда скорбети им, и от нужд их изведе я; и повеле бури, и ста в тишину, и умолкоша волны его. И возвеселишася, яко умолкоша, и настави я в пристанище хотенія своего. Да исповедят Господеви милости его и чудеса его сыновом человеческим; да вознесут его в церкви людстей, и на седалищи старец восхвалят его. Положил есть реки в пустыню и исходиша водная в жажду, землю плодоносную в сланость, от злобы живущих на ней. Положил есть пустыню во езера водная и землю безводную во исходища водная. И насели тамо алчущия, и составиша грады обителны; и насеяша села, и насадиша вінограды, и сотвориша плод житен. И благослови я, и умножишася зело; и скоты их не умали. И умалишася и озлобишася от скорби зол и болезни; изліяся уничиженіе на князи их, и заблуждати сотвори я по непроходней, а не по пути. И поможе убогу от нищеты и положи яко овцы отечествія. Узрят правїи и возвеселятся, и всякое беззаконіе заградит уста своя. Кто премудр и сохранит сія? и уразумеют милости Господни.

Псалом 107.

Готово сердце мое, Боже, готово сердце мое; воспою и пою во славе моей. Востани, слава моя, востани, псалтирю и гусли; востану рано. Исповемя тебе в людех, Господи, пою тебе во языцех; яко велія верху небес милость твоя и до облак истина твоя. Вознесися на небеса, Боже, и по всей земли слава твоя, яко да избавятся возлюбленніи твои; спаси десницею твоею и услыши мя. Бог возгла во святем своем; вознесуся и

разделю сікіму, и удоль селеній размерю. Мой есть галаад, и мой есть манассій, и ефрем заступленіе главы моея; іуда царь мой, моав коноб упованія моего; на ідумею наложу сапог мой; мне иноплеменницы покоришася. Кто введет мя во град огражденія? или кто наставит мя до ідумеи? Не ты ли, Боже, отринувый нас, и не изыдеши, Боже, в силах наших? Дажь нам помощь от скорби; и суетно спасеніе человеческо. О Бозе сотворим силу, и той уничижит враги наша.

Псалом 108.

Боже, хвалы моея не премолчи; яко уста грешнича и уста льстиваго на мя отверзошася, глаголаша на мя языком льстивым, и словесы ненавистными обыдоша мя, и брашася со мною туне. Вместо еже любити мя, оболгаху мя, аз же моляхся; и положиша на мя злая за благая, и ненависть за возлюбленіе мое. Постави на него грешника, и діавол да станет одесную его; внигда судитися ему, да изыдет осужден, и молитва его да будет в грех. Да будут дніе его мали, и епископство его да приимет ин; да будут сынове его сири, и жена его вдова; движущеса да преселятся сынове его и воспросят, да изгнани будут из домов своих. Да възыщет заимодавец вся, елика суть его; и да восхитят чуждіи труды его. Да не будет ему заступника, ниже да будет ущедряяй сироты его; да будут чада его в погубленіе, в роде единем да потребится имя его. Да воспомянется беззаконіе отец его пред Господем, и грех матере его да не очистится; да будут пред Господем выну, и да потребится от земли память их; занеже не помяну сотворити милость, и погна человека нища и убога, и умилена сердцем умертвити. И возлюби клятву, и приидет ему; и не восхоте благословенія, и удалится от него. И облечеса в клятву яко в ризу, и вниде яко вода во утробу его и яко елей в кости его; да будет ему яко риза, в нюже облачится, и яко пояс, имже выну опоясуется. Сіе дело оболгающих мя у Господа и глаголющих лукавая на душу мою. И ты, Господи, Господи, сотвори со мною имене ради твоего, яко блага милость твоя; избави мя, яко нищ и убог есмь аз, и сердце мое смятеса внутрь мене. Яко сень, внигда уклонитися ей, отяхся; стряхохся яко пружи. Колена моя изнемогоста от поста, и плоть моя изменися елеа ради. И аз бых поношеніе им; видеша мя, покиваша главами своими. Помози ми, Господи Боже мой, и спаси мя по милости твоей; и да разумеют, яко рука твоя сія, и ты, Господи, сотворил еси ю. Прокленут тїи, и ты благословиши; востающїи на мя да постыдятся, раб же твой возвеселится. Да облекутся оболгающїи мя в срамоту и одждутся яко одеждою студом своим. Исповемся Господеви зело усты моими и посреде многих восхваляю его; яко преста одесную убогаго, еже спасти от гонящих душу мою.

Псалом 109.

Рече Господь Господеви моему; седи одесную мене, дондеже положу враги твоя подножіе ног твоих. Жезл силы послет ти Господь от Сїона, и Господствуй посреде врагов твоих. С тобою начало в день силы твоея, во

светлостех святых твоих; из чрева прежде денницы родих тя. Клятсѧ Господь и не раскѧется; ты іерей во век по чину мелхіседекову. Господь одесную тебе сокрушил есть в день гнева своего цари; судит во языцех, исполнит паденія, сокрушит главы на земли многих. От потока на пути піет; сего ради вознесет главу.

Псалом 110.

Исповемся тебе, Господи, всем сердцем моим в совете правых и сонме. Велія дела Господня, изыскана во всех волях его; исповеданіе и великолепіе дело его, и правда его пребывает в век века. Память сотворил есть чудес своих; милостив и щедр Господь. Пищу даде боящимся его; помянет в век завет свой. Крепость дел своих возвести людем своим, дати им достояніе язык. Дела рук его истина и суд, верны вся заповеди его, утвержены в век века, сотворены во истине и правоте. Избавленіе посла людем своим; заоведа в век завет свой; свято и страшно имя его. Начало премудрости страх Господень, разум же благ всем творящим и; хвала его пребывает в век века.

Псалом 111.

Блажен муж бояйся Господа, в заповедех его восхощет зело. Сильно на земли будет семя его, род правых благословится; слава и богатство в дому его, и правда его пребывает в век века. Возсія во тме свет правым; милостив и щедр и праведн. Благ муж щедра и дая; устроит словеса своя на суде, яко в век не подвижится. В память вечную будет праведник. От слуха зла не убоится; готово сердце его уповати на Господа; утвердися сердце его, не убоится, дондеже возрит на враги своя. Расточи, даде убогим; правда его пребывает во век века; рог его вознесетсѧ в славе. Грешник узрит и прогневаетсѧ зубы своими поскрежещет и растает; желаніе грешника погибнет.

Псалом 112.

Хвалите, отроцы, Господа, хвалите имя Господне. Буди имя Господне благословено отне и до века. От восток солнца до запад хвально имя Господне. Высок над всеми языки Господь; над небесы слава его. Кто яко Господь Бог наш? на высоких живый, и на смиренныя призираяй на небеси и на земли; воздвизаяй от земли нища, и от гноища возвышаяй убога; посадити его с князи, с князи людій своих; вселяя неплодовъ в дом, матеръ о чадах веселящусѧ.

Псалом 113.

Во исходе Израилеве от египта, дому іаковля из людій варвар, бысть іудеа святыня его, Израиль область его. Море виде и побеже, іордан возвратисѧ вспять; горы възграшасѧ яко овни, и холми яко агнцы овчіи. Что ти есть, море, яко побегло еси, и тебе, іордане, яко возвратилсѧ еси вспять? горы, яко възграстесѧ яко овни, и холми яко агнцы овчіи? От

лица Господня подвижеса земля, от лица Бога іаковля; обращшаго камень во езера водная и несекомый во источники водныя. Не нам, Господи, не нам, но имени твоему даждь славу о милости твоей и истине твоей; да не когда рекут языцы; Господе есть Бог их? Бог же наш на небеси и на земли, вся елика восхоте, сотвори. Идоли язык сребро и злато, дела рук человеческих; уста имут, и не возглаголют; очи имут, и не узрят; уши имут, и не услышат; ноздри имут, и не обоняют; руце имут, и не осяжут; нозе имут, и не пойдут; не возгласят гортанем своим. Подобни им да будут творящии я и вси надеющии на ня. Дом Израилев упова на Господа; помощник и защититель им есть. Дом ааронь упова на Господа; помощник и защититель им есть. Боящиися Господа уповаша на Господа; помощник и защититель им есть. Господь помянув ны благословил есть нас; благословил есть дом Израилев, благословил есть дом ааронь, благословил есть боящияся Господа, малыя с великими. Да приложит Господь на вы, на вы и на сыны вашя; благословени вы Господеви, сотворшему нбо и землю. Нбо небесе Господеви, землю же даде сыновом человеческим. Не мертви восхвалят тя, Господи, ниже вси низходящии во ад; но мы живии благословим Господа отне и до века.

Псалом 114.

Возлюбих, яко услышит Господь глас моления моего, яко приклони ухо свое мне; и во дни моя призову. Обяша мя болезни смертныя, беды адовы обретоша мя; скорбь и болезнь обретох и имя Господне призвах; О, Господи, избави душу мою; милостив Господь и праведн, и Бог наш милует. Храняй младенцы Господь; смирихся, и спасе мя. Обратися, душе моя, в покой твой, яко Господь благодествова тя; яко изят душу мою от смерти, очи мои от слез и нозе мои от поползновения. Благоугожду пред Господем во стране живых.

Псалом 115.

В вероухах, темже возглаголах; аз же смирихся зело. Аз же рех во изступлении моем; всяк человек лож. Что воздам Господеви о всех, яже воздаде ми? Чашу спасения прииму и имя Господне призову; молитвы моя Господеви воздам пред всеми людьми его. Чтна пред Господем смерть преподобных его. О, Господи, аз раб твой, аз раб твой и сын рабыни твоея; растерзал еси узы моя. Тебе пожру жертву хвалы, и во имя Господне призову. Молитвы моя Господеви воздам пред всеми людьми его, во дворах дому Господня, посреде тебе, Иерусалиме.

Псалом 116.

Хвалите Господа, вси языцы, похвалите его, вси людие; яко утвердися милость его на нас, и истина Господня пребывает во век.

Псалом 117.

Исповедайтеся Господеви, яко благ, яко в век милость его. Да речет убо

дом Израилев; яко благ, яко в век милость его. Да речет убо дом ааронь; яко благ, яко в век милость его. Да рекут убо вси боящіися Господа; яко благ, яко в век милость его. От скорби призвах Господа, и услыша мя в пространство. Господь мне помощник, и не убоюся; что сотворит мне человек? Господь мне помощник, и аз воззрю на враги моя. Благо есть надеяться на Господа, нежели надеяться на человека; благо есть уповати на Господа, нежели уповати на князи. Все языцы обыдоша мя, и именем Господним противляхся им; обышедше обыдоша мя, и именем Господним противляхся им; обыдоша мя яко пчелы сот, и разгорешася яко огонь в тернии; и именем Господним противляхся им. Отриновен превратихся пасти, и Господь пріят мя. Крепость моя и пеніе мое Господь, и бысть ми во спасеніе. Глас радости и спасенія в селеніих праведных; десница Господня сотвори силу. Десница Господня вознесе мя, десница Господня сотвори силу. Не умру, но жив буду и повем дела Господня. Наказуя наказа мя Господь, смерти же не предаде мя. Отверзите мне врата правды; вшед в ня, исповемся Господеви. Сія врата Господня; праведніи внидут в ня. Исповемся тебе, яко услышал мя еси и был еси мне во спасеніе. Камень, егоже небрегоша зиждущіи, сей бысть во главу угла; от Господа бысть сей, и есть дивен во очесех наших. Сей день, егоже сотвори Господь, возрадуемся и возвеселимся в онь. О, Господи, спаси же, О Господи, поспеши же. Благословен грядый во имя Господне; благословихом вы из дому Господня. Бог Господь, и явился нам; составите праздник во учащающих до рог олтаревых. Бог мой еси ты, и исповемся тебе; Бог мой еси ты, и вознесу тя; исповемся тебе, яко услышал мя еси и был еси мне во спасеніе. Исповедайтесь Господеви, яко благ, яко в век милость его.

Псалом 118.

Блажени непорочніи в пути, ходящіи в законе Господни. Блажени испытующіи свиденія его, всем сердцем взыщут его. Не делающіи бо беззаконія в путех его ходиша. Ты заповедал еси заповеди твоя сохранить зело; дабы исправилися путіе мои, сохранить оправданія твоя. Тогда не постыжуся, внемда призрети ми на вся заповеди твоя. Исповемся тебе в правости сердца, внемда научитимися судьбам правды твоя. Оправданія твоя сохраню; не остави мене до зела. В чесом исправит юнейшій путь свой? внемда сохранить словеса твоя. Всем сердцем моим взысках тебе; не отрини мене от заповедій твоих. В сердца моем скрых словеса твоя, яко да не согрешу тебе. Благословен еси, Господи; научи мя оправданіем твоим. Устнама моима возвестих вся судьбы уст твоих. На пути свиденій твоих насладихся, яко о всяком богатстве. В заповедех твоих поглумлюся, и уразумею пути твоя. Во оправданіих твоих поучуся; не забуду словес твоих. Воздаждь рабу твоему; живи мя, и сохраню словеса твоя. Открой очи мои, и уразумею чудеса от закона твоего. Пришлец аз есмь на земли; не скрый от мене заповеди твоя. Возлюби душа моя возжелати судьбы твоя на всякое время. Запретил еси гордым; прокляти уклоняющіися от заповедій твоих.

Отими от мене поношеніе и уничиженіе, яко свиденій твоих взысках. Ибо седоша князи и на мя клеветаху, раб же твой глумляшеся во оправданіих твоих; ибо свиденія твоя поученіе мое есть, и совети мои оправданія твоя. Прильпе земли душа моя; живи мя по словеси твоему. Пути моя возвестих, и услышал мя еси; научи мя оправданіем твоим. Путь оправданій твоих вразуми ми, и поглумлюся в чудесех твоих. Воздрема душа моя от унынія; утверди мя в словесех твоих. Путь неправды остави от мене и законом твоим помилуй мя. Путь истины изволих и судьбы твоя не забых. Прилепихся свиденіем твоим, Господи, не посрами мене. Путь заповедій твоих текох, егда разширил еси сердце мое. Законоположи мне, Господи, путь оправданій твоих, и взыщу и выну; вразуми мя, и испытаю закон твой и сохраню и всем сердцем моим. Настави мя на стезю заповедій твоих, яко тую восхотех. Приклони сердце мое во свиденія твоя, а не в лихоимство. Отврати очи мои еже не видети суеты; в пути твоем живи мя. Постави рабу твоему слово твое в страх твой. Отими поношеніе мое, еже непщевах; яко судьбы твоя благи. Се, возжелах заповеди твоя; в правде твоей живи мя. И да приидет на мя милость твоя, Господи, спасеніе твое по словеси твоему; и отвечаю поношающим ми слово, яко уповах на словеса твоя. И не отими от уст моих словесе истинна до зела, яко на судьбы твоя уповах; и сохраню закон твой выну, в век и в век века. И хождах в широте, яко заповеди твоя взысках; и глаголах о свиденіих твоих пред цари и не стыдяхся; и поучахся в заповедех твоих, яже возлюбих зело; и воздвигох руце мои к заповедем твоим, яже возлюбих, и глумляхся во оправданіих твоих. Помяни словеса твоя рабу твоему, ихже упованіе дал ми еси. То мя утеши во смиреніи моем, яко слово твое живи мя. Гордіи законопреступоваху до зела; от закона же твоего не уклонихся. Помянух судьбы твоя от века, Господи, и утешихся. Печаль пріят мя от грешник, оставляющих закон твой. Пета бяху мне оправданія твоя на месте пришелствія моего. Помянух в нощи имя твое, Господи, и сохраних закон твой. Сей бысть мне, яко оправданій твоих взысках. Часть моя еси, Господи; рех сохранить закон твой. Помолихся лицу твоему всем сердцем моим; помилуй мя по словеси твоему. Помыслих пути твоя и возвратих нозе мои во свиденія твоя. Уготовихся и не смутихся сохранить заповеди твоя. Ужя грешник обязашася мне, и закона твоего не забых. Полунощи востах исповедатися тебе о судбах правды твоея. Причастник аз есмь всем боящимся тебе и хранящим заповеди твоя. Милости твоея, Господи, исполнь земля; оправданіем твоим научи мя. Благость сотворил еси с рабом твоим, Господи, по словеси твоему; благости и наказанію и разуму научи мя, яко заповедем твоим веровах. Прежде даже не смиритимися, аз прегреших; сего ради слово твое сохраних. Благ еси ты, Господи; и благостію твоею научи мя оправданіем твоим. Умножися на мя неправда гордых; аз же всем сердцем моим испытаю заповеди твоя. Усырися яко млеко сердце их; аз же закону твоему поучихся. Благо мне, яко смирил мя еси, яко да научуся оправданіем твоим. Благо мне закон уст твоих паче тысящ злата и сребра. Руце твои сотвористе мя и создасте мя; вразуми мя, и научуся заповедем

твоим. Боящіися тебе узрят мя и возвеселятся, яко на словеса твоя уповах. Разумех, Господи, яко правда судьбы твоя, и воистинну смирил мя еси. Буди же милость твоя, да утешит мя, по словеси твоему рабу твоему; да придут мне щедроты твоя, и жив буду, яко закон твой поучение мое есть; Да постыдятся гордіи, яко неправедно беззаконноваша на мя; аз же размышляти буду в заповедех твоих. Да обратят мя боящіися тебе и ведящіи свидения твоя. Буди сердце мое непорочно во оправданиях твоих, яко да не постыжуся. Изчезает во спасение твое душа моя, на словеса твоя уповах; изчезоша очи мои в слово твое, глаголюще; когда утетиши мя? зане бых яко мех на слане; оправданій твоих не забых. Колико есть дній раба твоего? когда сотвориши ми от гонящих мя суд? Поведаша мне законопреступницы глумления, но не яко закон твой, Господи. Вся заповеди твоя истина; неправедно погнаша мя, помози ми. Вмале не скончаша мене на земли; аз же не оставих заповедій твоих. По милости твоей живи мя, и сохраню свидения уст твоих. Во век, Господи, слово твое пребывает на небеси. В род и род истина твоя; основал еси землю, и пребывает. Учинением твоим пребывает день; яко всяческая работна тебе. Яко аще бы не закон твой поучение мое был, тогда убо погибл бых во смирении моем; во век не забуду оправданій твоих, яко в них оживил мя еси. Твой есмь аз, спаси мя; яко оправданій твоих взысках. Мене ждаша грешницы погубити мя; свидения твоя разумех. Всякія кончины видех конец; широка заповедь твоя зело. Коль возлюбих закон твой, Господи; весь день поучение мое есть. Паче враг моих умудрил мя еси заповедію твоею, яко в век моя есть. Паче всех учащих мя разумех, яко свидения твоя поучение мое есть. Паче старец разумех, яко заповеди твоя взысках. От всякаго пути лукава возбранных ногам моим, яко да сохраню словеса твоя; от судеб твоих не уклонихся, яко ты законоположил ми еси. Коль сладка гортани моему словеса твоя; паче меда устом моим. От заповедій твоих разумех; сего ради возненавидех всяк путь неправды. Светилник ногама моима закон твой, и свет стезям моим. Кляхся и поставих сохранить судьбы правды твоея. Смирехся до зела; Господи, живи мя по словеси твоему. Вольная уст моих благоволи же, Господи, и судбам твоим научи мя. Душа моя в руку твоею выну, и закона твоего не забых. Положиша грешницы сеть мне; и от заповедій твоих не заблудих. Наследовах свидения твоя во век, яко радование сердца моего суть; приклоних сердце мое сотворити оправдания твоя в век за воздаяние. Законопреступныя возненавидех, закон же твой возлюбих. Помощник мой и заступник мой еси ты; на словеса твоя уповах. Уклонитесь от мене, лукавнующи, и испытаю заповеди Бога моего. Заступи мя по словеси твоему, и жив буду; и не посрами мене от чаяния моего; помози ми, и спасуся, и поучуся во оправданиях твоих выну. Уничижил еси вся отступающыя от оправданій твоих; яко неправедно помышление их. Преступающыя непщевах вся грешныя земли; сего ради возлюбих свидения твоя. Пригвозди страху твоему плоти моя; от судеб бо твоих убояхся. Сотворих суд и правду; не предаждь мене обидящим мя. Восприими раба твоего во благо, да не оклеветают мене гордіи. Очи мои изчезосте во спасение твое и в слово правды твоея; сотвори с рабом

твоим по милости твоей, и оправданием твоим научи мя. Раб твой есмь аз; вразуми мя, и увем свидения твоя. Время сотворити Господеви; разориша закон твой. Сего ради возлюбих заповеди твоя паче злата и топазіа. Сего ради ко всем заповедем твоим направляхся, всяк путь неправды возненавидех. Дивна свидения твоя; сего ради испытана я душа моя. Явление словес твоих просвещает и вразумляет младенцы. Уста моя отверзох и привлекох дух, яко заповедий твоих желал. Призри на мя и помилуй мя, по суду любящих имя твое. Стопы моя направи по словеси твоему, и да не обладает мною всякое беззаконіе; избави мя от клеветы человеческия, и сохраню заповеди твоя. Лице твое просвети на раба твоего и научи мя оправданием твоим. Исходища водная изведосте очи мои, понеже не сохраних закона твоего. Праведен еси, Господи, и прави суди твои; заповедал еси правду свидения твоя, и истину зело. Истаяла мя есть ревность твоя; яко забыша словеса твоя врази мои. Разжжено слово твое зело, и раб твой возлюби е. Юнейший аз есмь и уничижен; оправданій твоих не забых. Правда твоя правда во век, и закон твой истина. Скорби и нужди обретоша мя; заповеди твоя поучение мое. Правда свидения твоя в век; вразуми мя, и жив буду. Возвах всем сердцем моим, услыши мя, Господи; оправдания твоя възыщу. Возвах ти, спаси мя, и сохраню свидения твоя. Предварих в безгодіи и възвах; на словеса твоя уповах. Предваристе очи мои ко утру, поучитися словесем твоим. Глас мой услыши, Господи, по милости твоей; по судьбе твоей живи мя. Приблизися гонящій мя беззаконіем; от закона же твоего удалишся. Близ еси ты, Господи, и вси путіе твои истина. Исперва познах от свидений твоих, яко в век основал я еси. Виждь смирение мое и изми мя; яко закона твоего не забых. Суди суд мой и избави мя; словесе ради твоего живи мя. Далече от грешник спасение, яко оправданій твоих не възыскаша. Щедроты твоя многи, Господи; по судьбе твоей живи мя. Мнози изгонящій мя и стужающій ми; от свидений твоих не уклонихся. Видех неразумеваящія и истаях; яко словес твоих не сохраниша. Виждь, яко заповеди твоя возлюбих; Господи, по милости твоей живи мя. Начало словес твоих истина, и во век вся судьбы правды твоя. Князи погнаша мя туне; и от словес твоих убояся сердце мое. Возрадуяся аз о словесех твоих, яко обретаяй корысть многу. Неправду возненавидех и омерзих; закон же твой возлюбих. Седмерицею днем хвалих тя о судьбах правды твоя. Мир мног любящим закон твой, и несть им соблазна. Чаях спасения твоего, Господи, и заповеди твоя возлюбих. Сохрани душа моя свидения твоя и возлюби я зело. Сохраних заповеди твоя и свидения твоя, яко вси путіе мои пред тобою, Господи. Да приблизится моление мое пред тя, Господи; по словеси твоему вразуми мя. Да внидет прошение мое пред тя; Господи, по словеси твоему избави мя. Отрыгнут устне мои пеніе, егда научиши мя оправданием твоим. Провещает язык мой словеса твоя, яко вся заповеди твоя правда. Да будет рука твоя еже спасти мя, яко заповеди твоя изволих. Возжелал спасение твое, Господи, и закон твой поучение мое есть. Жива будет душа моя и восхвалит тя; и судьбы твоя помогут мне. Заблудих яко овча погибшее; възыщи раба твоего, яко заповедий твоих не забых.

Псалом 119.

Ко Господу, внемда скорбети ми, возвах, и услыша мя. Господи, избави душу мою от устен неправедных и от языка льстива. Что дастся тебе, или что приложится тебе к языку льстиву? Стрелы сильного изощрены, со угльми пустынными. Увы мне, яко пришелствие мое продолжися, вселихся с селеніи кидарскими; много пришелствова душа моя; с ненавидящими мира бех мирен; егда глаголах им, боряху мя туне.

Псалом 120.

Возведох очи мои в горы, отнюдуже приидет помощь моя. Помощь моя от Господа, сотворшаго небо и землю. Не даждь во смятеніе ноги твоя, ниже воздремлет храняй тя; се, не воздремлет, ниже уснет храняй Израиля. Господь сохранит тя, Господь покров твой на руку десную твою. Во дни солнце не ожжет тебе, ниже луна ноцію. Господь сохранит тя от всякаго зла, сохранит душу твою Господь; Господь сохранит вхожденіе твое и исхожденіе твое, отныне и до века.

Псалом 121.

Возвеселихся о рекших мне; в дом Господень пойдем. Стояще бяху ноги наша во дворех твоих, Іерусалиме. Іерусалим зиждемый яко град, емуже причастіе его вкупе. Тамо бо въздоша колена, колена Господня, свиденіе Израилево, исповедатися имени Господню; яко тамо седоша престолы на суд, престолы в дому Давидове. Вопросите же яже о мире Іерусалима; и обиліе любящим тя. Буди же мир в силе твоей, и обиліе в столпостенах твоих. Ради братій моих и ближних моих глаголах убо мир о тебе. Дому ради Господа Бога нашего взысках благая тебе.

Псалом 122.

К тебе возведох очи мои, живущему на небеси. Се, яко очи раб в руку господій своих, яко очи рабыни в руку госпожи своея; тако очи наши ко Господу Богу нашему, дондеже ущедрит ны. Помилуй нас, Господи, помилуй нас, яко помногу исполнихомся уничиженія; наипаче наполнися душа наша поношенія гобзующих и уничиженія гордых.

Псалом 123.

Яко аще не Господь бы был в нас, да речет убо Израиль; яко аще не Господь бы был в нас, внемда востати человеком на ны, убо живых пожерли быша нас; внемда прогневатися ярости их на ны, убо вода потопила бы нас. Поток преjde душа наша; убо преjde душа наша воду непостоянную. Благословен Господь, иже не даде нас в ловитву зубом их. Душа наша яко птица избавися от сети ловящих; сеть сокрушися, и мы избавлени быхом. Помощь наша во имя Господа, сотворшаго небо и землю.

Псалом 124.

Надеющіися на Господа, яко гора Сіон; не подвижиться в век живый во Іерусалиме. Горы окрест его, и Господь окрест людей своих, отныне и до века. Яко не оставит Господь жезла грешных на жребій праведных, яко да не прострут праведніи в беззаконія рук своих. Ублажи, Господи, благія и правыя сердцем. Уклоняющыяся же в развращенія отведет Господь с делающими беззаконіе; мир на Израиля.

Псалом 125.

Внегда возвратити Господу плен Сіонь, быхом яко утешени. Тогда исполнишася радости уста наша, и язык наш веселія; тогда рекут во языцех; возвеличил есть Господь сотворити с ними. Возвеличил есть Господь сотворити с нами; быхом веселящеся. Возврати, Господи, плененіе наше, яко потоки югом. Сеющіи слезами, радостію пожнут. Ходящіи хождуху и плакахуся, метающе семена своя; грядуще же приидут радостію, вземлюще рукояти своя.

Псалом 126.

Аще не Господь созиждет дом, всеу трудишася зиждущіи; аще не Господь сохранит град, всеу бде стрегій. Всеу вам есть утреневати; востанете по седеніи ядущіи хлеб болезни, егда даст возлюбленным своим сон. Се, достояніе Господне сынове, мзда плода чревняго. Яко стрелы в руке сильнаго, тако сынове отрясенных. Блажен, иже исполнит желаніе свое от них; не постыдятся, егда глаголют врагом своим во вратех.

Псалом 127.

Блажени вси боящіися Господа, ходящіи в путех его; труды плодов твоих снеси; блажен еси, и добро тебе будет. Жена твоя яко лоза плодovита в странах дому твоего; сынове твои яко новосажденія масличная окрест трапезы твоя. Се, тако благословится человек бояйся Господа. Благословит тя Господь от Сіона, и узриши благая Іерусалима вся дни живота твоего, и узриши сыны сынов твоих; мир на Израиля.

Псалом 128.

Множицею брашася со мною от юности моя, да речет убо Израиль; множицею брашася со мною от юности моя, ибо не премогоша мя. На хребте моем делаша грешницы, продолжиша беззаконіе свое. Господь праведн ссече выа грешников. Да постыдятся и возвратятся вспять вси ненавидящіи Сіона; да будут яко трава на кровех, яже прежде восторженія изсше; еюже не исполни руки своя жняй, и недра своего рукояти собираяй; и не реша мимоходящіи; благословеніе Господне на вы, благословихом вы во имя Господне.

Псалом 129.

Из глубины воззвах к тебе, Господи; Господи, услыши глас мой. Да будут уши твои внимлюще гласу моления моего. Аще беззакония назириши, Господи, Господи, кто постоит? яко у тебе очищение есть. Имене ради твоего потерпех тя, Господи, потерпе душа моя в слово твое; упова душа моя на Господа. От стражи утрення до ночи, от стражи утрення да уповает Израиль на Господа; яко у Господа милость, и многое у него избавление; и той избавит Израиля от всех беззаконий его.

Псалом 130.

Господи, не вознесется сердце мое, ниже вознесостся очи мои; ниже ходих в великих, ниже в дивных паче мене. Аще не смиренномудрствовал, но вознесох душу мою, яко отдоеное на мать свою, тако воздаси на душу мою. Да уповает Израиль на Господа отныне и до века.

Псалом 131.

Помяни, Господи, Давида и всю кротость его; яко клятятся Господеви, обещаю Богу яковию; аще вниду в селение дому моего, или взыду на одр постели моея; аще дам сон очима моима, и веждама моима дреманіе, и покой скраіама моима; дондеже обрящу место Господеви, селение Богу яковию. Се, слышахом я во еифрафе, обретохом я в полях дубравы; внидем в селения его, поклонимся на место, идеже стоясте нозе его. Воскресни, Господи, в покой твой, ты и кивот святыни твоея. Сщеницы твои облекутся правдою, и преподобнии твои возрадуются. Двда ради раба твоего, не отврати лице помазаннаго твоего. Клятятся Господь Давиду истинною, и не отвержется ея; от плода чрева твоего посажду на престоле твоем. Аще сохранят сынове твои завет мой и свидения моя сия, имже научу я, и сынове их до века сядут на престоле твоем. Яко избра Господь Сиона, изволи и в жилище себе. Сей покой мой во век века, zde вселюся, яко изволих и. Ловитву его благословляяй благословлю, нищыя его насыщу хлебы; сщеники его облеку во спасение, и преподобнии его радостію возрадуются. Тамо возвращу рог Давидови, уготовах светильник помазанному моему. Враги его облеку студом, на нем же процветет святыня моя.

Псалом 132.

Се, что добро, или что красно, но еже жити братіи вкупе? Яко миро на главе, сходящее на браду, браду аарону, сходящее на ометы одежды его; яко роса аермонская сходящая на горы Сионскія; яко тамо заповеда Господь благословение и живот до века.

Псалом 133.

Се, ныне благословите Господа, вси рабы Господни, стоящии в храме Господни, во дворех дому Бога нашего. В нощех воздежите руки ваша во

святая и благословите Господа. Благословит тя Господь от Сиона, сотворивый небо и землю.

Псалом 134.

Хвалите имя Господне, хвалите, раби Господа, стоящи во храме Господни, во дворех дому Бога нашего. Хвалите Господа, яко благ Господь; пойте имени его, яко добро; яко іакова избра себе Господь, Израиля в достояніе себе; яко аз познах, яко велій Господь, и Господь наш над всеми боги; вся, елика восхоте Господь, сотвори на небеси и на земли, в морях и во всех безднах. Возводя облаки от последних земли, молнии в дождь сотвори, изводяй ветры от сокровищ своих. Иже порази первенцы египетскія от человека до скота; посла знаменія и чудеса посреде тебе, египте, на фараона и на вся рабы его. Иже порази языки многи и изби цари крепки; сиона царя аморрейска и ога царя васанска, и вся царствія ханаанска; и даде землю их достояніе, достояніе Израилю людем своим. Господи, имя твое в век, и память твоя в род и род; яко судити имать Господь людем своим, и о рабех своих умолится. Ідоли язык сребро и золото, дела рук человеческих; уста имут, и не возглаголют; очи имут, и не узрят; уши имут, и не услышат; ниже бо есть дух во устех их. Подобни им да будут творящи я и вси надеющіися на ня. Доме Израилев, благословите Господа; доме ааронь, благословите Господа; доме леиин, благословите Господа; боящіися Господа, благословите Господа. Благословен Господь от Сиона, живый во Іерусалиме.

Псалом 135.

Исповедайтесь Господеви, яко благ; яко в век милость его. Исповедайтесь Богу богов; яко в век милость его. Исповедайтесь Господеви господей; яко в век милость его. Сотворшему чудеса велія единому; яко в век милость его. Сотворшему небеса разумом; яко в век милость его. Утвердившему землю на водах; яко в век милость его. Сотворшему светила велія единому; яко в век милость его; солнце во область дне; яко в век милость его; луну и звезды во область ночи; яко в век милость его. Поразившему египта с первенцы его; яко в век милость его; и изведшему Израиля от среды их; яко в век милость его; рукою крепкою и мышцею высокою; яко в век милость его. Раздельшему чермное море в разделенія; яко в век милость его; и проведенному Израиля посреде его; яко в век милость его; и истрясшему фараона и силу его в море чермное; яко в век милость его. Проведшему люди своя в пустыни; яко в век милость его. Поразившему цари велія; яко в век милость его. И убившему цари крепкія; яко в век милость его; сиона царя аморрейска; яко в век милость его; и ога царя васанска; яко в век милость его. И давшему землю их достояніе; яко в век милость его; достояніе Израилю рабу своему; яко в век милость его. Яко во смиреніи нашем помяну ны Господь; яко в век милость его. И избавил ны есть от врагов наших; яко в век милость его; дай пищу всякой плоти; яко в век милость его. Исповедайтесь Богу небесному; яко в век милость его.

Псалом 136.

На реках вавилонских, тамо седохом и плакахом, внегда помянути нам Сіона; на вербіих посреде его обесихом органы наша. Яко тамо вопросиша ны пленшіи нас о словесех песней, и ведшіи нас о пеніи; воспойте нам от песней Сіонских. Како воспоем песнь Господню на земли чуждей? Аще забуду тебе, Іерусалиме, забвена буди десница моя. Прильпни язык мой гортани моему, аще не помяну тебе, аще не предложу Іерусалима, яко в начале веселія моего. Помяни, Господи, сыны едомскія в день Іерусалимль глаголющыя; истощайте, истощайте до основаній его. Дщи вавилоня окаянная, блажен, иже воздаст тебе воздаяніе твое, еже воздала еси нам; блажен, иже имет и разбіет младенцы твоя о камень.

Псалом 137.

Исповемся тебе, Господи, всем сердцем моим, и пред ангелы воспою тебе, яко услышал еси вся глаголы уст моих; поклонюся ко храму святому твоему и исповемся имени твоему о милости твоей и истине твоей, яко возвеличил еси над всем имя твое святое. В онъже аще день призову тя, скоро услыши мя; умножиши мя в души моей силою твоею. Да исповедятся тебе, Господи, вси царіе земстіи, яко услышаша вся глаголы уст твоих; и да воспоют в путех Господних, яко велія слава Господня; яко высок Господь, и смиренныя призирает, и высокая издалеча вестъ. Аще пойду посреде скорби, живиши мя; на гнев враг моих простерл еси руку твою, и спасе мя десница твоя. Господь воздаст за мя; Господи, милость твоя во век; дел руку твоею не презри.

Псалом 138.

Господи, искусил мя еси и познал мя еси; ты познал еси седаніе мое и востаніе мое. Ты разумел еси помышленія моя издалеча; стезю мою и уже мое ты еси изследовал и вся пути моя провидел еси. Яко несть льсти в языке моем; се, Господи, ты познал еси вся последняя и древняя; ты создал еси мя и положил еси на мне руку твою. Удивися разум твой от мене, утвердися, не возмогу к нему. Камо пойду от дха твоего? и от лица твоего камо бегу? Аще възыду на нбо, ты тамо еси; аще сниду во ад, тамо еси. Аще возму криле мои рано и вселюся в последних моря, и тамо бо рука твоя наставит мя, и удержит мя десница твоя. И рех; еда тма поперет мя? и ноць просвещеніе в сладости моей. Яко тма не помрачится от тебе, и ноць яко день просветится; яко тма ея, тако и свет ея. Яко ты создал еси утробы моя, воспріал мя еси из чрева матере моя. Исповемся тебе, яко страшно удивился еси; чудна дела твоя, и душа моя знает зело. Не утаися кость моя от тебе, юже сотворил еси в тайне, и состав мой в преисподних земли. Несоделанное мое видесте очи твои, и в книзе твоей вси напишутся; во днех созиждутся, и никтоже в них. Мне же зело честни быша друзи твои, Боже, зело утвердишася владычествія их; изочту их, и паче песка умножатся; востах, и еще есмь с тобою. Аще

избієши грешники, Боже; мужіе кровей, уклонитесь от мене. Яко ревниви есте в помышленіих, примут в суету грады твоя. Не ненавидящыя ли тя, Господи, возненавидех, и о вразех твоих истаях? Совершенною ненавистію возненавидех я; во враги быша ми. Искуси мя, Боже, и увещь сердце мое; истяжи мя и разумей стези моя; и виждь, аще путь беззаконія во мне, и настави мя на путь вечен.

Псалом 139.

Изми мя, Господи, от человека лукава, от мужа неправедна избави мя; иже помыслиша неправду в сердцах, весь день ополчаху брани; изостриша язык свой яко змий; яд аспидов под устнами их. Сохрани мя, Господи, из руки грешничи, от человек неправедных изми мя, иже помыслиша запяты стопы моя. Скрыша гордіи сеть мне и ужы, препяша сеть ногама моима; при стези соблазны положиша ми. Рех Господеви; Бог мой еси ты, внуши, Господи, глас моления моего. Господи, Господи, сило спасения моего, осенил еси над главою моею в день брани. Не предаждь мене, Господи, от желанія моего грешнику; помыслиша на мя, не остави мене, да не когда вознесутся. Глава окружения их, труд устен их покрывает я. Падут на них углія огненная, низложиши я во страстех, и не постоят. Муж язычен не исправится на земли; мужа неправедна злая уловят во истление. Познах, яко сотворит Господь суд нищим и мечь убогим. Обаче праведниі исповедятся имени твоему, и вселятся правіи с лицем твоим.

Псалом 140.

Господи, воззвах к тебе, услыши мя; вонми гласу моления моего, внемгда воззвати ми к тебе. Да исправится молитва моя яко кадило пред тобою; воздеяніе руку моею, жертва вечерняя. Положи, Господи, хранение устом моим и дверь ограждения о устнах моих. Не уклони сердце мое в словеса лукавствія, непщевати вины о гресех с человеки делающими беззаконіе; и не сочтуса со избранными их. Накажет мя праведник милостію и обличит мя, елей же грешнаго да не намастит главы моея; яко еще и молитва моя во благоволеніих их. Пожертвы быша при камени судіи их; услышатся глаголи мои, яко возмогша. Яко толща земли проседеса на земли, расточишася кости их при аде. Яко к тебе, Господи, Господи, очи мои; на тя уповах, не отими душу мою; сохрани мя от сети, юже составиша ми, и от соблазн делующих беззаконіе. Падут во мрежу свою грешницы; един есм аз, дондеже преїду.

Псалом 141.

Гласом моим ко Господу воззвах, гласом моим ко Господу помолихся. Пролію пред ним моление мое, печаль мою пред ним возведу. Внемгда исчезати от мене духу моему, и ты познал еси стези моя; на пути сем, по немуже хождах, скрыша сеть мне. Смотрях одесную и возглядах, и не бе знай мене; погибе бегство от мене, и несть взыскай душу мою. Воззвах

к тебе, Господи, рех; ты еси упование мое, часть моя еси на земли живых. Вонми моление моему, яко смирихся зело; избави мя от гонящих мя, яко укрепил еси мене. Изведи из темницы душу мою, исповедатися имени твоему; мене ждут праведницы, дондеже воздаси мне.

Псалом 142.

Господи, услыши молитву мою, внуши моление мое во истине твоей, услыши мя в правде твоей; и не вниди в суд с рабом твоим, яко не оправдится пред тобою всяк живой. Яко погна враг душу мою; смирил еси в землю живот мой; посадил мя еси в темных, яко мертвыя века. И уны во мне дух мой, во мне смятеся сердце мое. Помянух дни древния, поучихся во всех делах твоих, в творениях руку твоею поучахся. Воздох к тебе руке мои; душа моя яко земля безводная тебе. Скоро услыши мя, Господи, исчезе дух мой; не отврати лица твоего от мене, и уподоблюся низходящим в ров. Слышану сотвори мне заутра милость твою, яко на тя уповах; скажи мне, Господи, путь, в оньже пойду, яко к тебе взях душу мою. Изми мя от враг моих, Господи, к тебе прибегах. Научи мя творити волю твою, яко ты еси Бог мой; дух твой благодатен наставит мя на землю праву. Имене твоего ради, Господи, живиши мя правдою твоею; изведеша от печали душу мою; и милостию твоею потребиши враги моя и погубиши вся стужающыя души моей; яко аз раб твой есмь.

Псалом 143.

Благословен Господь Бог мой, научаяй руке мои на ополчение, персты моя на брань. Милость моя и прибежище мое, заступник мой и избавитель мой, защититель мой, и на него уповах; повинуйай люди моя под мя. Господи, что еси человек, яко познался еси ему? или сын человек, яко вменяеши его? Человек суете уподобися; дние его яко сень преходят. Господи, преклони небеса, и сниди; коснися горам, и воздымятся; блесни молнию, и разженеши я; послы стрелы твоя, и смятеши я. Послы руку твою с высоты, изми мя и избави мя от вод многих, из руки сынов чуждых, ихже уста глаголаша суету, и десница их десница неправды. Боже, песнь нову воспою тебе, во псалтири десятиструннем пою тебе; дающему спасение царем, избавляющему Давида раба своего от меча люта. Избави мя и изми мя из руки сынов чуждых, ихже уста глаголаша суету, и десница их десница неправды; ихже сынове их яко новосаждения водруженая в юности своей, дщери их удобрены, преукрашены яко подобие храма; хранилища их исполнена, отрыгающая от сего в себе; овцы их многоплодны, множащыяся во исходящих своих; волове их толсти; несть падения оплоту, ниже прохода, ниже вопля в стогнах их. Ублажиша люди, имже сия суть; блажени люди, имже Господь Бог их.

Псалом 144.

Вознесу тя, Боже мой, царю мой, и благословлю имя твое в век и в век

века. На всяк день благословлю тя, и восхваляю имя твое в век и в век века. Велий Господь и хвален зело, и величію его несть конца. Род и род восхвалят дела твоя и силу твою возвестят; великолепие славы святыни твоея возглаголют и чудеса твоя поведят; и силу страшных твоих рекут и величие твое поведят; память множества благости твоея отрыгнут и правдою твоею возрадуются. Щедр и милостив Господь, долготерпелив и многомилостив. Благ Господь всяческим, и щедроты его на всех делех его. Да исповедятся тебе, Господи, вся дела твоя, и преподобнии твои да благословят тя; славу царствія твоего рекут и силу твою возглаголют, сказати сыновом человеческим силу твою и славу великолепія царствія твоего. Царство твое царство всех веков, и владычество твое во всяком роде и роде. Верен Господь во всех словесех своих и преподобен во всех делех своих. Утверждает Господь вся низпадающыя и возставляет вся низверженныя. Очи всех на тя уповают, и ты даеши им пищу во благовременіи; отверзаеши ты руку твою и исполняеши всякое животное благоволенія. Праведен Господь во всех путех своих и прпбен во всех делех своих. Близ Господь всем призывающым его, всем призывающым его во истине; волю боящихся его сотворит, и молитву их услышит, и спасет я. Хранит Господь вся любящыя его, и вся грешники потребит. Хвалу Господню возглаголют уста моя; и да благословит всяка плоть имя святое его в век и в век века.

Псалом 145.

Хвали, душе моя, Господа; восхваляю Господа в животе моем, пою Богу моему, дондеже есмь. Не надейтесь на князи, на сыны человеческія, в нихже несть спасенія. Изыдет дух его, и возвратится в землю свою; в той день погибнут вся помышленія его. Блажен, емуже Бог іаковль помощник его, упование его на Господа Бога своего, сотворшаго небо и землю, море, и вся, яже в них; хранящаго истину в век, творящаго суд обидимым, дающаго пищу алчущым. Господь решит окованныя; Господь умудряет слепцы; Господь возводит низверженныя; Господь любит праведники. Господь хранит пришелцы, сира и вдову примет, и путь грешных погубит. Воцарится Господь во век, Бог твой, Сіоне, в род и род.

Псалом 146.

Хвалите Господа, яко благ псалом; Богови нашему да усладится хваление. Зиждай Іерусалима Господь; разсеянія Израилева соберет; изцеляяй сокрушенныя сердцем и обязуяй сокрушенія их; изчитаяй множество звезд, и всем им имена нарицай. Велий Господь наш, и велія крепость его, и разума его несть числа. Приемляй кроткія Господь, смиряяй же грешники до земли. Начните Господеви во исповеданіи, пойте Богови нашему в гуслех; одевающему небо облаки, уготовляющему земли дождь; прозябающему на горах траву и злак на службу человеком; дающему скотом пищу их, и птенцем врановым призывающым его. Не в силе констей восхоцет, ниже в лыстех мужеских благоволит; благоволит Господь в боящихся его и во уповающих на милость его.

Псалом 147.

Похвали, Іерусалиме, Господа, хвали Бога твоего, Сіоне; яко укрепи верей врат твоих, благослови сыны твоя в тебе. Полагаяй пределы твоя мир, и тука пшенична насыщайяй ты; посылаяй слово свое земли, до скорости течет слово его, дающаго снег свой яко волну, мглу яко пепел посыпающаго, метающаго голоть свой яко хлебы; противу лица мразы его кто постоит? Послет слово свое, и истает я; дхнет дух его, и потекут воды. Возвещайяй слово свое іакову, оправданія и судьбы своя Израилеви; не сотвори тако всякому языку, и судьбы своя не яви им.

Псалом 148.

Хвалите Господа с небес, хвалите его в вышних. Хвалите его вси ангели его; хвалите его, вся силы его. Хвалите его, солнце и луна; хвалите его вся звезды и свет. Хвалите его, небеса небес и вода, яже превыше небес. Да восхвалят имя Господне; яко той рече, и быша; той повеле, и создашася. Постави я в век и в век века; повеленіе положи, и не мимо идет. Хвалите Господа от земли, зміеве и вся бездны; огонь, град, снег, голоть, дух бурен, творящая слово его; горы и вси холми, древа плодоносна и вси кедри; зверіе и вси скоти, гади и птицы пернаты; царіе земстіи и вси людіе, князи и вси судіи земстіи; юноши и девы, старцы с юнотами. Да восхвалят имя Господне; яко вознесеса имя того единого, исповеданіе его на земли и на небеси. И вознесет рог людіи своих; песнь всем преподобным его, сыновом Израилевым, людем приближающимся ему.

Псалом 149.

Воспойте Господеву песнь нову; хваленіе его в церкви преподобных. Да возвеселится Израиль о сотворшем его, и сынове Сіони возрадуются о цари своем. Да восхвалят имя его в лице, в тимпане и псалтири да поют ему. Яко благоволит Господь в людех своих, и вознесет кроткія во спасеніе. Восхвалятса преподобніи во славе и возрадуются на ложах своих. Возношенія Божія в гортани их, и мечи обоюду остры в руках их; сотворити отмщеніе во языцех, обличенія в людех; связати цари их путы, и славныя их ручными оковы железными; сотворити в них суд написан. Слава сія будет всем преподобным его.

Псалом 150.

Хвалите Бога во святых его, хвалите его во утверженіи силы его; хвалите его в силах его, хвалите его по множеству величествія его; хвалите его во гласе трубнем, хвалите его во псалтири и гуслех; хвалите его в тимпане и лице, хвалите его во струнах и органе; хвалите его в кимвалех доброголасных, хвалите его в кимвалех восклицанія. Всякое дыханіе да хвалит Господа.

Псалом 151.

Мал бех в братіи моей и юншій в дому отца моего; пасох овцы отца моего. Руце мои сотвористе орган, и персты мои составиша псалтирь. И кто возвестит Господеви моему? Сам Господь, сам услышит; сам посла ангела своего, и взят мя от овец отца моего, и помаза мя елеем помазанія своего. Братія моя добри и велицы; и не благоволи в них Господь. Изыдох в сретеніе иноплеменнику, и проклят мя ідолы своими. Аз же исторгнув мечь от него, обезглавих его и отях поношеніе от сынов Израилевых.

Песни в Священном Писании

Песнь 1; песнь моисеова, зри во книзе исход, глава 15, стіхи 1-19.

Песнь 2; песнь моисеова, зри во второзаконіи, глава 32, стіхи 1-43.

Песнь 3; песнь анны матере самуила пррока, зри во книзе царств, глава 2, стіхи 1-10.

Песнь 4; молитва святого пррока аввакума, зри во книзе пррока сего, глава 3, стіхи 1-19.

Песнь 5; песнь святого isaи пррока, зри во книзе пррока сего, глава 26, стіхи 1-21.

Песнь 6; молитва іоны пррока, зри во книзе пррока сего, глава 2, стіхи 3-10.

Песнь 7; молитва святого азаріи, зри во книзе пррока даніила, глава 3, стіхи 26-45.

Песнь 8; пеніе святых тріех отрок, зри во книзе пррока даніила, глава 3, стіхи 52-90.

Песнь 9; песнь престыя бцы еильская, зри во святем еили от луки, глава 1, стіхи 46-55.

Песнь 10; молитва святого пррока захаріи, отца прдтечева, зри во святем еили от луки, глава 1, стіхи 68-79.

[Go to the top](#)

Миссионерский Листок #

Издательство храма Покрова Пресвятой Богородицы

Copyright (c) 2000 and Published by

Holy Protection Russian Orthodox Church

2049 Argyle Av, Los Angeles, California, 90068, USA

Редактор: Епископ Александр (Милеант)

(psalms_slavonik.doc, 06-22-2000)